



Тем, что эта книга дошла до Вас, мы обязаны в первую очередь библиотекарям, которые долгие годы бережно хранили её. Сотрудники Google оцифровали её в рамках проекта, цель которого – сделать книги со всего мира доступными через Интернет.

Эта книга находится в общественном достоянии. В общих чертах, юридически, книга передаётся в общественное достояние, когда истекает срок действия имущественных авторских прав на неё, а также если правообладатель сам передал её в общественное достояние или не заявил на неё авторских прав. Такие книги – это ключ к прошлому, к сокровищам нашей истории и культуры, и к знаниям, которые зачастую нигде больше не найдёшь.

В этой цифровой копии мы оставили без изменений все рукописные пометки, которые были в оригинальном издании. Пускай они будут напоминанием о всех тех руках, через которые прошла эта книга – автора, издателя, библиотекаря и предыдущих читателей – чтобы наконец попасть в Ваши.

Правила пользования

Мы гордимся нашим сотрудничеством с библиотеками, в рамках которого мы оцифровываем книги в общественном достоянии и делаем их доступными для всех. Эти книги принадлежат всему человечеству, а мы – лишь их хранители. Тем не менее, оцифровка книг и поддержка этого проекта стоят немало, и поэтому, чтобы и в дальнейшем предоставлять этот ресурс, мы предприняли некоторые меры, чтобы предотвратить коммерческое использование этих книг. Одна из них – это технические ограничения на автоматические запросы.

Мы также просим Вас:

- **Не использовать файлы в коммерческих целях.** Мы разработали программу Поиска по книгам Google для всех пользователей, поэтому, пожалуйста, используйте эти файлы только в личных, некоммерческих целях.
- **Не отправлять автоматические запросы.** Не отправляйте в систему Google автоматические запросы любого рода. Если Вам требуется доступ к большим объёмам текстов для исследований в области машинного перевода, оптического распознавания текста, или в других похожих целях, свяжитесь с нами. Для этих целей мы настоятельно рекомендуем использовать исключительно материалы в общественном достоянии.
- **Не удалять логотипы и другие атрибуты Google из файлов.** Изображения в каждом файле помечены логотипами Google для того, чтобы рассказать читателям о нашем проекте и помочь им найти дополнительные материалы. Не удаляйте их.
- **Соблюдать законы Вашей и других стран.** В конечном итоге, именно Вы несёте полную ответственность за Ваши действия – поэтому, пожалуйста, убедитесь, что Вы не нарушаете соответствующие законы Вашей или других стран. Имейте в виду, что даже если книга более не находится под защитой авторских прав в США, то это ещё совсем не значит, что её можно распространять в других странах. К сожалению, законодательство в сфере интеллектуальной собственности очень разнообразно, и не существует универсального способа определить, как разрешено использовать книгу в конкретной стране. Не рассчитывайте на то, что если книга появилась в поиске по книгам Google, то её можно использовать где и как угодно. Наказание за нарушение авторских прав может оказаться очень серьёзным.

О программе

Наша миссия – организовать информацию во всём мире и сделать её доступной и полезной для всех. Поиск по книгам Google помогает пользователям найти книги со всего света, а авторам и издателям – новых читателей. Чтобы произвести поиск по этой книге в полнотекстовом режиме, откройте страницу <http://books.google.com>.

Min.
BV
50
E7V18

B

0
0
0
0
0
7
0
9
3
8



UC SOUTHERN REGIONAL LIBRARY FACILITY

DR. K.M. KHANTAMOUR
ARMENIAN COLLECTION



University of California Library, Los Angeles

**Ն Շ Խ Ա Ր Ք
Ն Ա Խ Ն Ե Ա Ց**

Ա.

**Ի ՀԱՅՐԱՊԵՏՈՒԹԵԱՆ
Տ. Տ. ԳԷՈՐԳԱՅ
ՎԵՀԱՓԱՌ ԿԱԹՈՂԻԿՈՍԻ
ԱՄԵՆԱՅՆ ՀԱՅՈՑ**

**ՀՐԱՄԱՆԱԻ
ՊԱՏՐԻԱՐՔԻ ՄՐԲՈՑ ԵՐՈՒՍԱՂԷՄԻ
Տ. Ե Ս Ա Յ Ե Ա Ց
ՄՐԱԶԱՆ ԱՐՔ ԵԳԻՍԿՈԳՈՍԻ**

**ԵՒ Ի ՊԱՏՐԻԱՐՔՈՒԹԵԱՆ Կ. ՊՕԼՍՈՑ
Տ. Ն Ե Ր Ս Ի Ս Ի
ՄՐԱԶԱՆ ԱՐՔ ԵԳԻՍԿՈԳՈՍԻ**



**ՅԵՐՈՒՍԱՂԷՄ
Ի ՏԳԱՐԱՆԻ ՄՐԲՈՑ ՅԱԿՈՎԲԵԱՆՑ
1875**

Generated on 2017-11-07 10:52 GMT / http://hdl.handle.net/2027/uc1.b0000070938
Public Domain, Google-digitized / http://www.hathitrust.org/access_use#pd-google

MIN
BV
50
E7V18

Ա Ջ Պ

ՉՏՊԱԳՐՈՒԹԻՒՆ ամբողջական գրչագիր
երկոց իւրաքանչիւր Մատենագրի Թողլով ա.
պատան 'ի յաջողուածս բարեպատեհ ժամա-
նակի և ձեռնտուութեան Ազգայնոց՝ բարւոք
վարկանիմք գէթ 'ի բազում ճատից և 'ի Բանից
իւրաքանչիւր Հեղինակի առնուլ զմին կամ
զերկուս և հետզհետէ ածել 'ի լոյս փոքր դը-
րիւք ընդ անուամբս ՆՇԽԱՐԲ ՆԱԽԵՆԱՑ:

Ահա՛ յայս առաջին նուագ . բաղդատու-
թեամբ երկուց գրչագիր օրինակաց , ընծա-
յեմք 'ի վայելս հասարակաց զբուն Վահրա-
մայ Վարդապետի Դ Յայտնութիան Տեան եւ
յՕժամն Լեւոնի Արայի Հայոց , վստահ լինելով
թէ ոչ անախորժ ընթերցանելեաց Թուիցի
ան , իւրովն սրտաշարժ պարունակութեամբ
ղարթուցանելով 'ի միտս զքաղցր յիշատակ
Թագադրութեան առաջնոցն մերոց Հայածին
Արքայից :

— Երանյան —

1982631

Generated on 2017-11-07 10:52 GMT / http://hdl.handle.net/2027/uc1.b0000070938
Public Domain, Google-digitized / http://www.hathitrust.org/access_use#pd-google



**ՎԱՀՐԱՄԱՅ ՎԱՐԴԱՊԵՏԻ
ԱՏԵՆԱԴՊՐԻ
ԼԵԻՈՆԻ ԱՐՔԱՅԻ
ԲԱՆ
Ի ՅԱՅՏԵՆՈՒԹԻՒՆ ՏԵԱՌՆ
ԵՒ
ՅՕԾՈՒՄՆ ԼԵԻՈՆԻ
Գ. ԱՐՔԱՅԻ**

« Բղխեսցէ գաւաղան յարմատոյն Յեսեայ
և ելցէ ծաղիկ յարմատոյ անտի և հանգիցէ Դ
Վերայնորա Հոգի Աստուծոյ, Հոգի իմաստու-
թեան և հանճարոյ, Հոգի խորհրդոյ և զօրու-
թեան, Հոգի գիտութեան և աստուածայաշ-
տութեան, եւ լցցէ զնա Հոգի Իրկիւղի Աս-
տուծոյ » : Եսայ . ԺԱ . 1—3 :

ՍԿԻԶԲՆ ամենայն տօնից տէրունականաց
Աստուածայայանութեանս տօն է, յորում յա-

և ուր յայտնեցաւ Աստուած մարդ ծննդեամբ
'ի միշտ կուսէն , որ երն , և միշտ էն 'ի միշտ
էէն՝ 'ի վեր քան զքան , եղեալ մարմին տի-
րապէս և մնացեալ մարմին իսկապէս . զմերս
առեալ ստուգապէս և զիւրն պահեալ ան-
յեղապէս : Բանն վառն մեր մարմին եղեալ
և ոչ փոխադրեալ , 'ի մարմին միացեալ և ան-
շփոթ մնացեալ . ոչ բաժանեալ և ոչ այլայ-
լեալ : Այլ 'ի կուսէ ծնեալ և մարդ կտա-
րեալ երեւեալ , յերկրի ինքն Աստուած եւ
մարդ խոստովանեալ : Զամենայն ինչ զմարդ-
կան անախտաբար կամաւորապէս կրեալ եւ
զնոսին ազնուականութիւն ինքեամբ 'ի մեզ
վերագրեալ , եւ ոչ ինչ նմա 'ի կրիցն տի-
րեալ . այլ գերագոյն նոցին 'ի կրելն կա-
ցեալ . ծնեալ և յանիծիցն զմեզ գնեալ . ըն-
ծայեալ և զանութիւնս մեր Հօր Աստուծոյ
նուիրեալ : Մկրտեալ և զմեզս մեր Յօրդա-
նանու լուացեալ . զփառակիցն իւր զՀոգին
ընկալեալ և զնոյն առատապէս 'ի մեզ բաշ-
խեալ . լոյս 'ի խաւար աշխարհի ծագեալ և
զմէգ մթութեան մեղաց մերոց փարատեալ .
կենարար վարդապետութեամբ զհոգիս մարդ-
կան լուսաւորեալ և աստուածային սքանչե-
լեօք զմարմինս մեր վերանորոգեալ . 'ի բարձ-
րութիւն խաչին ամբարձեալ , և նովաւ յեր-
կինս զմերս բնութիւն բարձրացուցեալ : Յա-
րուցեալ եւ գլուխ մեր գոլով ամենայն

մարդկային բնութեամբս ընդամէն Հօր նըստեալ : Եւ այսպէս Որդին Աստուծոյ՝ Որդի մարդոյ եղեալ և զմարդկան որդիս ինքեամբ որդիս Աստուծոյ վերասանդեալ : Յորոց օրհնութիւնն միշտ և երկրպագութիւնն նմա , որ զայս շնորհն 'ի մեզ կատարեաց :

Արդարև . « Ո՛խօսեցի զզօրութիւնս Տեառն և լսելի արասցէ զամենայն օրհնութիւնս նորաոչ Ճմարտապէս , « Այսօր է՝ զոր արար Տեր , եկայք ցնծասցուք և ուրախ եղիցուք 'ի սըմա » : Օրհնեցուք զառաքեալն 'ի Հօրէ , որ օրհնեաց զմեզ յերկնաւորն օրհնութիւնն՝ որ ոչ անցանէ : Երգեսցուք երգ նոր Աստուծոյ մերոյ . որ նորոգեաց այսօր զմարմին խոնարհութեան մերոյ ըստ նմանութեան փառաց իւրոց : Բարեբանեսցուք զԱստուած 'ի ոքանչեքս սրբութեան նորա : որ նորահրաշ ծննդեամբ իւրով յարոյց զաղքատս յերկրէ և բարձր արար զտառապեալս յաղբեւաց : Մեծապէս գոհաբանեսցուք ընդ հովուացն այսօր զՀովիւն քաջ՝ որ նստի 'ի Քերովբէս , և եկն 'ի իւրնդիր բնութեանս մերոյ մուրրեալ ոչխարի եւ թափեաց 'ի բերանոյ յանուանեալն առ իւծու զբլթակ ունկան նախամօրն չարաչար լսելութեամբ , եւ զոտս Նախահօրն՝ անպատշաճաբար 'ի ծառն ընթացողութեան : Եւ ցնծութեամբ ընդ մեծին Դաւթի ասելով , « Տեր հովուեսցէ զիս » , որդէս ողբա ,

ցաք երբեմն ընդ նմա գոչելով թէ . «Մահ հով-
ուեացէ զնոսադ : Ընդ մեզուցն ոսկւոյն և կրն-
դրկին և զըմուսոյն՝ ընծայեացուք նմա պատ-
ուասիրաբար իբրեւ երկնաւոր արքայի՝ ըզ-
խոհականութիւն և զմաքրութիւն սրտի . իբր
Աստուծոյ՝ զանուշահոտութիւն վարուց մերոց,
առաւել քան զկնդրկի՝ և զմեռելութիւն բա-
ցադործելով, որ 'ի մեզն է ախտից, յաղագս
սիրոյ այնմ՝ որ 'ի վերայ մեր մեռաւ և յա-
րեաւ, ընդ ամենայն արարածս արագեացուք
առաւելեալք 'ի պաշտօն նմա, որ առաւել
քան զամենեսեան բարերարեալք եղաք 'ի նմա-
նէ : Առցուք ջուր ուրախութեան յաղբերացն
փրկութեան 'ի մարգարէից անտի և յառա-
քելական ձայնից, որք հրաշացուցին զաւուրս
պատիւ՝ որոց պարակից եղեալ աստուածաբա-
նութեամբ նոցին հնչմանց, մանաւանդ տե-
սանողին զբարձրագոյնան և բարբառողին ըզ-
հրաշալիս Եսայեայ որդւոյն Ամովսայ, որ 'ի
խորհուրդ աւուրս լուսոյ խօսի ասելով :

Բղխեսցէ գաւազան յարմատոյն Յեսսեայ,
և ելցեն ամենայն մարգարէք, որք ծաղկեցան 'ի
տանն Իսրայելի, բազմամասն և բազմօրինակ
բանիւք խօսեցան վասն փրկագործ տնօրէնու-
թեանց Որդւոյն Աստուծոյ, մանաւանդ յաղա-
գրս ծննդեան՝ որ 'ի սրբոյ կուսէն : Եւ թէ
զտեսութիւն իրին ընդ վարագուրաւ բանին
ծածկեցին, ընդ այս մի ուրուք միտք աւարա-

դոյնս խորհեցին • քանզի նոքա ըստ ժամանակին և ըստ կարողութեան լսողացն զբանն պատշաճեցուցանէին: Ձի որպէս 'ի գառնն ըստուերական՝ առ այնմ՝ ժամու թագուցեալ կայր Գառնն ճշմարտութեան, եւ 'ի մանանայն՝ որ յերկնից՝ Հացն կենդանութեան, և 'ի ջուրն, որ բղխեալ 'ի վիմէն • Արիւնն կենարարին 'ի կողէն, եւ 'ի գաւազանն ծաղկեալ Ահարովնին՝ գաւազանն բողբոջեալ 'ի յարմատոյ անտի Յեսսեայն • այսպէս և յարդարոցն մարմնատեսակ բանս՝ ծածկեալ կայր խորհուրդս մեր լուսաւորութեան: Աստն հրէական ազգի տկարամտութեան և առ 'ի գիրն միայն լարշութեան, զորս թողցուք իբրեւ զմեռեալ ըստ հոգւով և մեք մաղթեսցուք ընդ մեծին Դաւթի ասելով. « Բայց զաչս իմ և նայեցայց 'ի սքանչելիս օրինաց քոց ու որով 'ի նոյն հոգւոյ օժանդակեալ, տեսցուք օակաւուք զյուրովագոյն ծածկեալ իմաստս, որ է 'ի բանս առաջի եդեալ մեր: Ո՛չ զյուրովագոյնս 'ի մտածութեանցն 'ի մէջ առնելով, և ոչ ճոխ ընդարձակ բանիւ զասացեալսն մերձ գնելով • քանզի առաջի կայ մեր և վասն այլ եւս խորհրդածութեան ընդ սմին խօսիլ • վասն որոց զի մի ընդ յորովաբանութեամբ պարսաւանօք անկցուք • համառօտ յաղազս մարգարէական բանիս խօսեսցուք՝ որ ասէ • Բղխեսցէ գաւազան յարմատոյն: Յանմարմնաբար ծնելոյն 'ի

Հօրէ՛, զմարմնական ծննդենէն՝ որ՛ի Մարի-
ամայ սրբոյ կուսէն ճառել կամելով մարգա-
րէն, բղխել՝ զնոյն վերագոյ՛է : Ըստ որում Ե-
ղիսաբէթ զճնունդ սրբոյ կուսին : պտուղ ո-
րովայնի նորա օրհնաբանէր : Իսկ հրեշտակն
զնոյն աւետէր . « Որ՛ի նմա ծնեալն է՛ ՚ի Հոգ-
ւոյն Արբոյ » և թէ . « Ծնցի որդի », և սոյն մար-
գարէ որ աստ բղխումն կոչէ, զնոյն դարձեալ և
ճնունդ անուանէ . « Ահա կոյս յղասցի և ծըն-
ցի որդի », և թէ . « Մանուկ ծնաւ մեզ, որդի
տուաւ մեզ » : Այսու զբարձրագոյն խոր-
հուրդն մեզ աւանդելով՝ ծննդեամբն զծնեալ
՚ի սրբոյ կուսէն անդուստ ՚ի նորին բնու-
թենէ նշանակելով գոլ ճշմարտապէս, և բրիւ-
մամբն և պտղովն՝ զանախտաբար և զառանց
արատոյ յայտնեալն ՚ի Մարիամայ ցուցանե-
լով իսկապէս Քանդի և զառաջինն ճնունդ,
որ անմայր ՚ի Հօրէ՛ այսպէս Գիրք Աստուա-
ծային յայտնաբանեն : Ծնունդ որպէս և է .
զնա զանազանեն ըստ բանին՝ որ ՚ի Հօրէ՛ առ-
նա թէ . « Յարգանդէ յառաջ քան զարուսեակ
ճնայ գքեզ ո : Եւ դարձեալ ՚ի հայրականն որտէ
՚ի Հօրէ՛ բղխեալ զբանն վերահռչակեն ըստ
առ ՚ի Հօրէ՛ բարբառոյն թէ . « Բղխեսցէ սիրտ
իմ զբան բարի » : Ոչ թէ այսու բղխումն ՚ի
Հօրէ՛ զՈրդին ցուցանեն, զի այս Հոգւոյն է
յատուկ առանձնաւորութիւն : այլ որպէս ըղ-
Հոգին Սուրբ՝ որ բղխումն է ՚ի Հօրէ՛ ճնունդ

զնա Գիրն կաշէ : ըստ սրում՝ Սողովմն մեծն՝
Միաժին զնա անուանէ : այսպէս : եւ զԸ-
նեայն զՌոգի՛ բղխումն 'ի Հօրէ պատմաբա-
նէ . որպէս զի ծննդեամբն զանութեան է-
տկութիւնն ընդ Հօր զՌոգւոյ եւ զՀոգւոյն
յայտնեացէ 'ի նորին գոլ յեութենէ : Եւ
բղխմամբն զանախառութիւնն եւ զառանց
չարչարանաց եւ հոսման զելումն գուշա-
կեացէ : Այլ ըստ առանձնաւորութեանն՝
զՌոգի ծնունդ միշտ եւ զՀոգի՛ բղխումն 'ի
Հօրէ առանձնաւորութեամբ ըստ յատկու-
թեանն բանի նոյն աստուածային Գիրք քա-
բօզէ : Սոյնպէս եւ զմարմնոյն ծնունդն՝
բղխումն 'ի կռուէն՝ մարգարէն ասէ : Ի նը-
կարագրութենէ աստի յայտնի է : զի ոչ ըստ
Հրէիցն 'ի Դաւիթ կամ յԵզեկիայ վերա-
բերի : Զի թէպէտ յարմատոյ անտի Յեսսեայ
էին նոքա , սակայն եզեալք էին եւ թագաւո-
րեալք : յոր ժամ մարգարէն զբանս ճառէր
եւ այս զառյայայսն եւ զլինելոյն իրաց խօսի .
որ 'ի Տէր մեր Յիսուս Քրիստոս կատարի :
Իսկ եթէ ժպրկեցի որք 'ի Զօրաբարէլ լուծանել
զբանս իբր թէ դեռ ևս բղխելոց էր , զհետ
եկեալքն ոչ ևս , ձեռնտու լինին եւ ոչ պատշա-
ճագոյն , զի ո՛ւր եհար նա զերկիր բանիւ բե-
րանոյ իւրոյ եւ կամ երբ առ նովաւ գայլք
եւ գառիկք 'ի միասին ճարակեցան : Ըստ ո-
րում Գրիտոս Աւետարանական բանիւն վճ-

Generated on 2017-11-07 10:54 GMT / http://hdl.handle.net/2027/uc1.b0000070938
Public Domain, Google-digitized / http://www.hathitrust.org/access_use#pd-google

բեալ՝ վանեաց զամենայն երկրաւոր և զմեղ-
սասէր խորհուրդ և զգործ և 'ի նորին մար-
մնաւորութենէ անտի գայլաբարոյ եւ հեղք
եւ գառնամիտք այս է զգօնամիտք 'ի մի աւ-
բօտ մարմնոյ եւ արեանն Քրիստոսի ճարա-
կին :

Յազազս որոյ ըստ տիրապէս տեսութեաւ,
նրն , 'ի նոյն ինքն 'ի նա յայտնարանի նախա-
ճառութիւնս՝ թէ . «Բողոքեցէ գաւաղան յար-
մատոյն Յեսսեայո : Քանզի կոյսն յարմատոյ ան-
տի Դաւթի էր և Աբրահամէ՝ յորմէ և Բանն
մարմին էառ իսկապէս , զոր բղխեալ ասէ ,
յայտ արարեալ զառանց ամուսնութեան ծը-
նունդն : Ո՛չ ասէ 'ի սերմանէ կամ յերկրէ , այլ
յարմատոյն գաւաղանն բղխեցէ . զի ոչ թէ
յարմատան անցանիցէ . այլ զի 'ի բնութենէ
կուսին առնուցու մարմին . ոչ յերկնից ինչ բե-
րեալ մարմին , և ոչ այլ ինչ 'ի նոր արարա-
ծոց , եւ ոչ զինքն 'ի մարմին շրջեալ . այլ
մարմին ճշմարիտ առեալ 'ի կուսէն հանդերձ
մտօք և շնչով յիւր մարմին բանին Աստու-
ծոյ , և ոչ մարդոյ ուրուք մարմին արտաքոյ
քան զինքն՝ որպէս Պօղոս ասէ , թէ . «Եկն և
եղեւ 'ի կնոջէ » : Եւ թէ յարմատոյ անտի 'ի
նախնեացն էր նա ըստ մարմնոյ՝ ընդ այն մի
փոքրագոյն ինչ խորհեցիս :

Քանզի նոյն ինքն նա և արմատ էր Յեսսեայ
և ամեայն սերկւոյն Ագամայ , որպէս նոյն ինքն

ասէր 'ի Յայտնութեանն Յովհաննու : « Ես Յիսուս Քրիստոս առաքեցի զհրեշտակ իմ վկայել զայս ձեզ եկեղեցեացդ . ես եմ արմատ և սեռ 'ի Դաւթէ և յԱդամայ և Աստղ առաւօտին և Հոգին և Փետայն որ գալոց եմ » : Եւ սոյն մարգարէ զսա ինքն կոչէ արմատ . « Պատմեցաք ասէ , զնմանէ իբրև զմանուկ , իբրև զարմատ 'ի ծարաւուտ երկրի » : Արդ նա՝ որ ոչ միայն արմատ , այլ և Աքարիչ էր , յարմատոյ անտի Յեսսեայ բղխեաց գաւազան յետոյ մարմնով ծնեալ 'ի կուսէն անախտաբար : Եւ բարւոք զՅեսսէ բերէ 'ի մէջ զաննչանն և ոչ նշանաւորն զԴաւիթ . նա և Աւետարանիչքն նոյնպէս առնն , զի ցուցցեն թէ ոչ ումքէ գարչեցաւ Տէրն հասարակաց : Եւ զմարմին բան գաւազան կոչէ զԹագաւորութիւնն և զհովուական առաջնորդութիւնն յայտ առնելով : Զի գաւազան 'ի ձեռս ունին թագաւորք եւ հովիւք . ըստ այսմ և այլ մարգարէքն խօսին զնոյն խորհուրդ մարգեղաւթեան բանին , ըստ որում Դաւիթ . « Գաւազան զօրութեան առաքեցէ , ասէ , քեզ Տէր 'ի Աիօնէ » : Եւ թէ՛ « Յուպ քո և գաւազան նոքա մխիթարեցեն զիս » :

Եւ ինքն Բանն գնելով զանձն իւր 'ի չարչարանս Խաչին , ասէր 'ի ձեռն Զաքարիայ՝ թէ . « Եւ առ ից զգաւազանն իմ զգեղեցիկ ցրբել զուխտ իմ 'ի մէջ Յուդայ և Իսրայել » :

զի յազդեաց մեզ դատաստանս և կրաւունս
ընդ թշնամին կենաց և փրկութեան մերոյ ,
հասուցանելով նոցին նեղութիւն և մեզ ըզ-
հանցիսան անվախճան : Իբրեւ զԹագաւոր :
որոյ յաթռն յաւիտեանս յաւիտենից գա-
ւազան ուղղութեան գողով , գաւազան Թա-
գաւորութեան նորա : Եւ հովուեաց մեզ ա-
րածելով 'ի վայրս փափկութեան և 'ի շուք
հանգստեան և 'ի ցուպ յարուցիչ բնութեանս :
Եւ այսոքիկ անուանք ըստ մարմնոյն միաւո-
րութեան ասին 'ի վերայ նորա , և մարմնոյն
ասելով ոչ թէ բաժանեմք զՔանն 'ի մարմ-
նոյն , այլ պատճառս տամք զարժանն իմանալ
Քանզի և ինքն իսկ զհայրականն իւր ծնունդ .
յայտնաբանէ , և ընդ նմին զառ 'ի կուսական
իւր ծննդենէ ասէ : Ա յապէս բարբառելով 'ի
բերանոյն Դաւթի . Տէր իմ , Հայր իմ ասաց
ցիս Արդի ի՞մ ես գու ծնեալ , յորմէ բնութենէ
և յէութենէ անժամանակ և անախտաբար .
անմայր 'ի յերկինս անսկզբնաբար , եւ ես
յայսօր ժամանակի վասն փրկութեան մարդ-
կան ծնայ զքեզ 'ի կոյս մօրէ՝ անհայր 'ի
յերկրի : Եւ այլուք թէ . « Յառաջ քան զա-
րուսեակ ծնայ զքեզ » : Եւ թէ . « Դու ես
քահանայ յաւիտեան ըստ կարգին Մելքի-
սեդեկի » : Եւ զայսպիսի որանչելեօք ծնունդ
նորին լսելով 'ի կուսէ և անախտաբար իբրեւ
յարմատոյ եւ ծնեալն Աստուած եւ ծնողն

միշտ կոյս : մի՛ տկարագոյնս ինչ մտածե՞ս ,
քե՛ս , անհնարին զնոյն կարծելով . զի վասն այ-
նորիկ այս ահաւոր խորհուրդ յառաջագոյն
օրինակօք յայանեցաւ . զի 'ի կատարումն ե-
կեալ քեզ քարոզ դիւրընկալ առ 'ի հաւատ
եղիցին . և մի՛ 'ի բնութեանս բան հայելով .
անկարելի զերան վարկանիցիս . յաղագս որոյ
պարտիս զմտաւ ածել . զի Արարիչն բնութեան
էր . որ զայս ներգործեաց՝ որում և ամենայն
բնութեան գործք 'ի ներքոյ անկեալ անսան
նորին հրամանի . որպէս հուրն՝ ցօզ առ
երեք Մանկունքն , եւ ջուրն՝ արիւն առ Ե-
գիպտացիան և հրով վառեալ մորենին անկէզ
առ Մովսիսիւ : Եւ նշան գեղմանն առ Գե-
գէոն . և վէմն աղբերացեալ առ Իսրայէլացիս .
և Յորդանան 'ի վեր դարձեալ . և ծովն բա-
ժանեալ , եւ դաւաղանն գալարացեալ , եւ
Սառայ և այլ եւս ամուլք ծնեալք : Եւ Յոր-
դանանաւ Նէեման սրբեալ , և ծանրութիւն
տապարին թեթեւութեամբ փայտին 'ի նը-
մանէ Եղիսէիւ վերաբերեալ , եւ ջուրք Ե-
րիքովի բժշկեալք , և 'ի լեռնէ վէմն առանց
ձեռին հատեալ , և այլ եւս յօլովագոյնք 'ի
նախնումն 'ի վեր քան զբնութիւն հրաշա-
գործեալ՝ զվերս փրկութեան խորհուրդ լու-
սաւորագոյնս նշանակեալ : Վասն որոյ առան-
ձին յայլոցն տեսցուք զԵսայիաս թէ զինչ
արդեօք կոչիցէ զմարմնաւորականն գալուստ :

Եւ ելցէ, ասէ, ծաղիկ յարմատոյ անտի. և այսու զաճումն յայտ առնէ. զի ելցեն և վերացին զառ սակաւ սակաւ աճումն յայտ առնէ. և ոչ ասէ թէ յայլմէ, այլ ինքն յինքենէ աճեսցէ գաւազանն :

Իբրու թէ ոչ երբէք թարշամեցի ծաղիկ գաւազանին : Եւ ծաղիկն զայլ գունակ կերպարանս նշանակէ զնորա քան զայլ մարմնոցն : ըստ այնմ թէ. «Գեղեցիկ է նա տեսլեամբ քան զամենայն որդիս մարդկան » : Թէպէտ և ըստ Աստուածութեանն անտես և անհաս գոյ, և ըստ մարմնոյ աղդեցութեանն անշուք և անփառ յերկրի շրջելոյն, ուր տեղի ոչ ունէր իջեմանի, և ոչ փառք եւ փարթամութիւն սնտոի : Միանգամայն և՛ ի չարչարանս խաչին խոնարհեալ անգեղ և անարգ զնմանէ, ասէրօ զսոյն Եսայիաս. «Տեսաք մեք զնա և ոչ գոյր նորա տեսիլ և ոչ գեղեցկութիւն » :

Դարձեալ ծաղիկ զնորին տնտեսութիւնն վերագոչելով տեսանելի օրինակաւ զքարձրագոյնսն տայ մեզ իմանալ : Զի ըստ որում ծաղիկք սկզբունք և նախաշաւիղք են պտղոցն երեւման եւ կատարելութեան, այսպէս եւ փրկականն Քրիստոսի յայտնութիւնն նախ ծաղկեցաւ անախտաբար ՚ի կուսական արգանդէ, և ապա յետ կենդանարար իւրոյ մըկրտութեանն պտղաբերեաց ՚ի մեզ զնշանսն և զվարդապետութիւնն ՚ի փրկութիւնն հոգ-

ւոյ մերոց և մարմնոց . և այս սկիզբն պարտաւորեալն :

Իսկ յորժամ բարձրացաւ 'ի փայտ խաչին ողկոյզն օրհնութեան , յայնժամ ծաղկեցոյց յանգամս իւր 'ի մեզ զպարգեւս Հոգւոյն . զի մինչեւ ցայն վայր չեւ եւս էր տուեալ զՀոգին . քանզի Յիսուս չժւ էր փառաւորեալ խաչին , պտղաբերեալ 'ի գերեզմանէն , զոր յետ յարութեանն ասէր . “ Տըւաւ ինձ ամենայն իշխանութիւն յերկինս և յերկրի , և թէ . “ Յանուն Յիսուսի Քրիստոսի ամենայն ծունր կրկնեսցի ” , և այլն : Այսպէս և մեք անդամք գոլով նմա , ըստ գլխոյն մերոյ պատշաճի և յարմարութեան , իմանամք զմեզ մերձ եղեալ առ նա որչափ եմք 'ի կենցաղս յայս . ոչ իբրև թէ արդէն առեալ եմք զխոստացեալն մեզ բարութիւն և կամ թէ հասեալ իցեմք 'ի նոյն այժմ արդեամբք . այլ յուսով և հաւատով զՀոգւոյն շնորհ եւ զորդեգրութեանն սլայման առհաւատչեայ ընկալեալ , ծաղկեալք աստանօր բարեպաշտութեան հաւատով եւ արդարութեան գործով , ընդ նմին ընդ գլխոյն մեր յարուցեալքս՝ ընդ նմին և նստցաւք յերկնաւոր փառան անդանօր շահելով զծաղկիս այսորիկ զպտղաբերութիւն : Զի զոր գլուխն մեր յետ իւրոյ յարութեանն , զնոյն և մեք յետ մերն յարութեան ժառանգիցիմք զպատիւ և զփառս

անվախճանս : Զի յաղագս այսորիկ նա մեզ՝
առաջին պտուղ կոչեցաւ . քանզի որպէս յող-
կոյղ՝ պտուղ իմն խայծեալ հաւաստութիւն
է և այլոցն՝ ՚ի նոյն նմանութիւն հասանել
այսպէս և ընդ գլխոյն մեր յարութեան եւ
մեք ընդ նմին յարուցեալ և ՚ի փառս նովաւ
բարձրացեալ՝ ե՛ւ յանձառ կեանս վերագը-
րեալ լինիմք : Եւ հանգիցէ ՚ի վերայնորա Հո-
գի Աստուծոյ :

Ամաչեսցեն հերետիկոսքն , որ աստիճանս
իմն մուծանեն ՚ի զուգահաւասար Սուրբ Եր-
րորդութիւնն՝ զՈրդի փոքր ասելով քան ըզ-
Հայր և զՀոգի նուազ քան զՈրդի : Առ որս
ասելի է թէ գրեցուք զՈրդի փոքր քան ըզ-
Հայր որպէս գուք հայհոյէք . Հոգւոյն զի՛նչ կա-
րօտ էր բանն՝ զորմէ դուք ասէք նուաստ գոլ
զնա , զի ամենայն նուազ ՚ի լաւէ անտի օրհ-
նեսցի :

Այլ վասն մեր յիւր շնչական և ՚ի նիւ-
թական մարմինն ընդունի բանն Հօր՝ զՀո-
գին , զհանձար և զաստուածապաշտութիւն ,
զի ինքեամբ մեզ ցուցցէ օրինակ . թէ մեք
եմք կարօտ այնպիսի պարգեւաց Հոգւոյն Աս-
տուծոյ , և ոչ նա՝ որ Տէրն է , կարօտ ինչ է
Հոգի ընդունելով . այլ ՚ի նմա երեւելով Հո-
գւոյն մեզ լինիցին հաւատարիմ՝նորա երախ-
տիքն : Զի որպէս մարդն լինելով ոչ եթէ կա-
րօտ ինչ էր ևւ սակս այնորիկ եղեւ մարդ :

այլ զի մարգն լինելով արասցէ զմարգիկ որդիս
Աստուծոյ : Նոյնպէս և յընդունել զՀոգին,
ոչ եթէ իբրև զկարօտ որ ընկալաւ. այլ զի կա-
րօտելոց ինքեամբ բաշխեսցէ զՀոգին Սուրբ :
Ձի թէ ամենայն ինչ Հօր նորա է. որպէս ինքն
ասաց . յայտ է թէ Հոգին Հօր նորա բնու-
թենակից և էակից է . քանզի և իւր իսկ
է Հոգին սրպէս և ասէ թէ, « Յիմէ անտի առ-
նուցու և պատմեսցէ ձեզ . և թէ . Երթամ և
առաքեմ զնա » : Եւ Պօղոս թէ . « Որ զՀոգին
Քրիստոսի ոչ ունի , սա չէ նորա » . և Գար-
ձեալ թէ . « Առաքեսց զՀոգի Որդւոյ իւրոյ
'ի սիրտս մեր » : Եւ Պետրոս ասէ թէ . « Մար-
գարէքն իօսէին , յորում և յորպիսի ժամա-
նակի ազգէր 'ի նոսա Հոգին Քրիստոսի » :
Վասն որոյ և Յովհաննէս ասաց թէ . « Աչ ե-
թէ չափով տայ Աստուած զՀոգին » . զի ոչ
տայ և ոչ չափէ . քանզի 'ի նմին իսկ է . վասն
որոյ որպէս զանձն իւր եդ 'ի վերայ խաշան-
ցըս . նոյնպէս և զՀոգին իւր բնակից ետ 'ի
կենդանութիւն մեռելութեան աշխարհի՝ կա-
մօք Հօր և նորին իսկ Հոգւոյն Սրբոյ : Բայց
միտ դիւր ասացելոցս՝ զոր ասէ թէ . « Հանգիցէ
'ի վերայ նորա Հոգի Աստուծոյ » , զտնօրէ-
նութեամբ հաճոյ լինելն Հօր յայտ առնէ , որ-
պէս և ասացն իսկ թէ . « Դա է Որդի իմ
սիրելի ընդ որ հաճեցայ » : Քանզի բանն մարգ-
ելեալ գերբնապէս . և 'ի բնաւորականն մարգ»

կութեան երեւեալ գտաւ հանգիստ Հոգւոյն Սրբոյ :

Եւ այս ևս յաղագս մեզ օրինադրութեան, որք պարտին այնպէս գնալ որպէս նայն գընաց . և Քրիստոսի գլխոյն մերոյ անգամք յօգեալ և պատշաճեալ քրիստոսեանքս պարտիմք 'ի խաչ հանել զմարմինս կարեօք և ցանկութեամբ աշխարհի, և այնպէս արժանաւոր հանգիստ գտանել Հոգւոյն Սրբոյ :

Ձի որպէս մարմին լինելովն ոչ մնաց Հոգին 'ի նոսին, այսպէս ընդ Հոգւոյն միաբանելոց և նովաւ կնքելոցն յաւետ պարգեւեսցի հանգչիլ եւ մշտնջենաւորել Հոգին առ նոսին 'ի գլխոյն մերմէ 'ի մեզ հեղեալ և մնացեալ : Եւ ասելովն թէ, « Ի վերայ նորայ, ցուցանէ թէ 'ի վերուստ է Հոգին : Հոգի իմաստութեան և հանձարոյ Հոգի խորհրդոյ և զօրութեան : Եւ զի՛նչ պէտք էին իմաստութեան այնմ, որ Հօր գոլով իմաստութիւն . և իմաստութեամբն այնու հիմունս արկեալ եղեւ երկրի, եւ իմաստութեանն այնմ ոչ գոյ բաւ, եթէ ոչ զմարմնական տնօրէնութենէն յայտ առնէ, ըստ այնմ թէ. « Յիսուս աճէր իմաստութեամբ և շնորհօք » : Ընդ որ ժպիրհ Հրէայքն սքանչացեալ ասէին . « Սմառւստի՛ է այս իմաստութիւն, զի ուսեալ բընաւ չիք, եւ զՔիրս գիտէ : Նոյնպէս եւ հանձար և խորհուրդ առնուլ նմա, որ իւր էր

խորհուրդ և հանձար : որպէս ասէ Սողոմոն
նիւ և ընդ Հօր միշտ աւնէր զայս բնաւո-
րապէս : Այլ մարդկաբար է իմանալ, որ յա-
մենայն հարցուածս դաւաճանութեան և 'ի
քննութիւնս կեղծաւորելոցն՝ գերագոյն հան-
ճարով զՀրէիցն զդպիրսն ըմբերանէր և զա-
ռակաւոր եւ զհանձարեղագոյն վարդապե-
տութիւնսն բարբառէր : Իսկ, «Հոգի զօրու-
թեան», զի դարձաւ Յիսուս, ասէ, Հոգւով զօ-
րութեամբ Հոգւոյն 'ի Գալիլեայ եւ առնէր
զնշանսն և զսքանչելիսն : «Հոգի գիտութեան
եւ աստուածապաշտութեան լոցէ զնա Հոգի
երկիւղի Աստուծոյ » : Ըստ մարմնաւորու-
թեան Տեառն մերոյ իմա՛ և զայս, որպէս ա-
սէր Դաւիթ՝ թէ. «Ի՞ժօ՞ զքեզ Աստուած Աս-
տուած քո իւզով ուրախութեամբ առաւել
քան զընկերս քո » . այս է քան զամենայն
դասս օժելոցն, քանզի նոքա ծառայք գոլով՝
մասին իմն Հոգւոյն ընդունակք եղեն : Ոմն
իմաստութեան, որպէս Բեսելիէլ, և Սողո-
մոն : Ոմն հանձարոյ, որպէս Յովսէփ և Դա-
նիէլ : Ոմն զօրութեան, որպէս Սամիսոն և
Գեդէօն և այլք : Ոմանք խորհրդոյ և գիտու-
թեան, որպէս ամենայն մարգարէքն : Եւ ո-
մանք աստուածապաշտութեան, որպէս Դաւիթ
և Եղեկիսս և Յովսեբաս : Իսկ նա, որ Աստ-
ուած մարդացեալն, ըստ տնօրէնութեան ըզ-
լութիւն Հոգւոյն յինքն վասն մեր ընկալաւ :

Վասն որոյ ասէ մարգարէն թէ. « Լըցէ զնա
Հոգի երկիւղի Աստուծոյ » :

Զի որպէս չէ որ բաւական Հօր, բայց մի-
այն անձն Որդւոյ, և ոչ Որդւոյն՝ թէ ոչ ծոցն
Հօր, նոյնպէս և ոչ Հոգւոյն Արքոյ, եթէ ոչ
Որդի, որ էակիցն միայն իսկ է : Եւ արդ ե-
թէ իւր իսկ է Հոգին, ընդէր ընուցու նովաւ.
եթէ ոչ վասն մեր, զի որ եցոյցն զՀոգին յան-
ձին հանդերձ ամենայն պարզեւօքն, յայն սակս
եցոյց, զի յերկիղն Աստուածպաշտութեան մեր-
ձեցուսցէ զմեզ : Զի զանձնէ ոչ երբէք ասաց
թէ ես երկեայ 'ի քէն. այլ թէ ես սիրեցի ըզ-
քեզ. քանզի Որդւոյ սէր վայելէ և ոչ երկիւղ :

Իսկ եթէ ժպրհիցի Հրէայն 'ի մարգս յո-
մանս լուծանել զգրեալս՝ ցուցցէ թէ ո՛վ որ
'ի մարդկանէ բաւական եղեւ ամենեւիմբ
զամենայն Հոգին ընդունել : Զի թէպէտ
և կատարեցին գործս ինչ առաւել քան զայլ
մարդիկ, որպէս Իաւիթ եւ Եղեկիայ՝ որ
ապրեցոյց աղօթիւք զքաղաքն Երուսաղէմ, և
Զօրաբաբէլ սակայն փոքր ինչ և միայն յիրս ինչ
և Աստուծոյ օգնականութեամբ եւ զօրու-
թեամբ : Եւ այն, որ զսոցանէ կարծէ զասա-
յեալս զՔրիստոսէ, ընդէր ոչ յանձն առնու-
ցու զնախաճառութիւնս, որ թէ զի՛նչ ինչ
զօրութիւնս կատարեաց, սոյն իսկ մարգարէ
յայտ առնէ ասելով. « Իշխանութիւն իւր 'ի
վերայ սւսոց իւրոց » : Եւ ոչ այսչափ միայն,

այլ և յաջորդս առաջի եգեալ ընթերցուածոյս
ցուցանէ զասացելոցս զօրութիւն եւ յանդի-
մանէ զանամօթան . քանզի ասէ թէ՛ ոչ՝ ի կար-
ծըս դատեսցի . զի Աստուած է , և ծածկեալ
քըն մեր յայտնի են նմա , և ոչ ըստ խօսից
յանդիմանեացէ , զի այսպիսի իրք ոչ մարդոյ
են, այլ Աստուծոյ . ըստ այնմ թէ . «Մածուկքն
Տեառն Աստուծոյ մերոյ յայտնի են» . և թէ .
«Մարդ յերեսս , իսկ Աստուած ՚ի սիրտս հա-
յի» . յորմէ մեք բազում անգամ վերիպիմք . և
զանաչառն եւս յայտնէ գատաստան , եր ոչ
ըստ բանից յանդիմանէ . այլ և զծածուկս՝ ի մէջ
բերէ , զի դատաւորք աշխարհի յայտնիս քննէն
և յալովս վերիպին յիրաւացւոյն : իսկ Աստուած
և զծածուկսն քննէ . ըստ այնմ թէ . «Ձանգործս
իմ աեսին աչք քո» . և թէ . «Նա քննէ զգաղտ-
նիս սրտից մերոց» . և թէ . «Կենդանի է բանն
Աստուծոյ և ազգող» . զի անցանիցէ մինչև ՚ի
բաժանումն շնչոյ և հոգւոյ և քննիչ է մտաց , զի
ոչ միայն զշունչն ՚ի մարմնոյն մեկնէ , այլ և ըզ-
շնորհս Հոգւոյն ՚ի շնչոյն . վասն որոյ ոչ գը-
րոց կամ բանի կարօտի , այլ արասցէ իրաւու-
նըս տնանկին եւ յանդիմանեացէ զխոնարհս
երկրի յաւուր մեծի Յայտնութեան իւրոյ :
Ահաւասիկ տքա աստուածութեանն են իսկ
նշանակ :

Յաղագս հրաշափառ իտրհրդոյ բարեբա-
նեալ առուրս լուսոյ և նորոգութեան աստ-

ուածային յայտնութեանս յողովք են աստ-
ուածաբանիցն բանք և Սրբոց Հարցն 'ի նո-
սին աշխատասիրաբար տեսութիւնք : Ուստի
և մեզ ատենաբանական սպասաւորութիւն
հասեալ, բազում էին բանք և գժուարապա-
տումք, այլ այսոքիկ բաւական լիցին, զևս յա-
ճախագոյնան այլոյ թողով տեղւոյ և ժամա-
նակի, մանաւանդ բարձրագունիցն յիմաստա-
քան զմեզ և երիցագունիցն անձանց, և մեք
խօսեսցուք յազապս այլ իմն խորհրդածու-
թեան, յոր ժամանեալ բարեպաշտաբար մի-
ահամուռ ժողովեցաք այսօր :

Ձի յաւուրս Յայտնութեան անմահ և երկ-
նաւոր թագաւորին մերոյ Յիսուսի Քրիստո-
սի եկաս մերս Սուրբ Ժողովոյ և աստուածա-
յինս լրութեան գումարիլ աստանօր յեկեզե-
ցւոյ և զառ 'ի քաջ և 'ի բարեպաշտ արմատոց
բղխեալ դաւապանն և զբոյս բարեպաշտու-
թեան զպսակաւորս Լեւոն օծանել և ընծայել
'ի թագաւորութիւն Տանս Թորգոմայ Ազգիս
Հայաստանեայց :

Բեր ուրեմն փոքր ինչ յազապս թագաւորու-
թեան խօսեսցուք յԱստուածաշունչ Գրոց :
Նախ առաջին քննելով թէ զի՞նչ է թագաւո-
րութիւն, և ապա թէ ո՞վ է առաջին թագաւորս
Երրորդ թէ յորմէ՞ հետէ, և կամ զի՞սրդ ըս-
կրուաւ թագաւորութիւն 'ի մարդիկ : Եւ շոր-

տորդ թէ զի՞նչ են կորգ եւ իրաւունք թա-
գաւորի :

Թագաւորութիւնն է ըստ ուղիղ բանին՝ ի
վերայ աշխարհի՝ որ իւր է վիճակեալ և ՚ի նը-
մա բնակելոցն իշխել, արդարացի հարկս և ի-
րաւունս ՚ի նոցանէ առնուլ և զնոսին ՚ի հաս-
տատութեան պահել : Արտաքին թշնամեա-
ցըն քաջութեամբ պատերազմաւ յաղթել,
եւ կամ հաշտութեան հետիւք զխաղա-
ղութիւն ողջունել : Եւ զամենայն ին-
քեան հնազանդեալսն առանց իրիք պատ-
ճառի յօրէնս եւ յիրաւունս անլուծանե-
լի ունել, բարեգործացն գովութիւնս և պա-
տիւս շնորհել, և չարեացն և որք արտաքոյ օ-
րինացն արշաւիցին՝ տանջանս և պատիժս հա-
սուցանել : Ոչ երեւելի փառօք բարձրամտեալ
այլ սպասաւոր Աստուծոյ թագաւորութեանն
զինքն նկատել՝ ըստ Սողոմոնի թէ, « Լուարսւք,
թագաւորք, զի սպասաւոր էք Աստուծոյ թա-
գաւորութեանն » և գլխաւորելով ասասցուք,
Թագաւորութիւնն է, որ իշխէ զբազումսն
եւ զբաժանեալսն ըստ անձանց և ըստ ա-
րուեստից, նաև ըստ բարուց, և թէ գէպ լի-
ցի ըստ կրօնից, բարեպաշտութեամբ և իմաս-
տութեամբ ՚ի խաղաղութիւն և ՚ի բարեկար-
գութիւն նուաճել : Եւ այս է սահման թա-
գաւորի :

Յետ այսորիկ խնդրելէ է թէ՛ սվ է առա-

Չին թագաւոր : Արդ վերագոյն այս սահմա-
նի , և եւս և քան զոր կարեմք իմանալ և ճա-
ռել , ո՞նչ այլ ոք առաջին թագաւոր , բայց ե-
թէ երանականն և փառաւորեալ Սուրբ Եր-
րորդութիւնն երկրպագեալ 'ի մի Աստուածու-
թեան և Տէրութեան , ըստ մարգարէին թէ .
« Թագաւոր մեծ 'ի վերայ ամենայն երկրի Աս-
տուած էր . որ առ 'ի յինքեան բարերարութե-
նէ արարչագործելոցն ի շնէ առհասարակ վեր-
նոցն և ներքնոցն : Եւ զամենեւեան շարժելով
միասնական և պարզ զօրութեամբն իւրով
յիւրաքանչիւր բնութիւն և 'ի մի միաւորու-
թիւն զնոսին պահեալ՝ պնդէ և դարձուցանէ
'ի ժողովարանն իւր Նախախնամութեան և
յԱստուածարարն պարզութիւն : Նախ զբա-
զումն և զզանազանսն՝ ըստ փառաց և ըստ
պատուոյ զանմարմինսն , ոյք են պարզք և ան-
շարադիրք բնութեամբ . և ապա ազգս ամե-
նայն առաջնապէս , զորս 'ի սմա նրբագոյնք
են՝ որպէս լուսաւորացդ կարգ՝ զանազանու-
թեամբ , պայծառութեամբ և ընթացից . և ա-
պա զորս 'ի հակառակ պատճառաց 'ի մի մի-
ութիւն եզեն գոյացեալ , որպէս զմարդ 'ի հո-
գւոյ գոլով և 'ի մարմնոյ , երկնային և երկ-
րաւոր , մահկանացու և անմահ : Ընդ որոց և
զամենայն արիւնաւոր կենդանիս զառ 'ի բազ-
մաց շարադրեալ , և նա և զամենայն ազգի
ազգի անշնչից տեսակս : այլ եւ զամենեցուն

զգալեացս զարմատ և զսկիզբն՝ զտարերս : ուրոց սիրելութիւն և հակաուակութիւն արարչական հրամանաւ նորին զամենայն նիւթակաւնրս յիւրում էութեանն անլուծանելի ունի : Եւ այսպէս ամենակալ թագաւորութեամբն իւրով զամենեսեան կալեալ և պնդեալ ունի յանքակտելի միութիւն և՛ ի խաղաղութիւն, և ամենակարող զօրութեամբն իւրով ամենեցուն ըստ իւրաքանչիւր տեսակի կառավարէ և տիրէ : յորս և ինայէ և նախախնամէ : ըստ Ազգոմնի թէ . « Տիրելոք քս ամենեցուն , խնայել տայ քեզ զամենեսեան » :

Ուստի և յանբաւ բարերարութենէն իւրոյ և զայս ևս պատիւ շնորհեաց արարածոց իւրոց, որպէս ՚ի հրեզինացն դասակարգեաց յիշխանարար պետութենէն իւրմէ Իշխանութիւնս և Տէրութիւնս, Զօրութիւնս և Պետութիւնս առ ՚ի նախախնամել զնուաստագոյնան . և հազորդեցուցանել գերագոյն լուսափայլութեանցըն . քանզի են ՚ի նոսա արգարեւ խոնարհագոյնք և վեհագոյնք և նոցին պաշտօնեայք : Եւ այլք, որպէս ասիցէ ոք, անդրանիկք յանմարմին էութեանցն և առ դուրս գերագայ Սուրբ Երրորդութեանն կեցեալք : Զորս ոչ միայն յանուանց նոցին է իմանալ , այլ և ՚ի գործաւորութեանցն, յորժամ ՚ի ձև մարմնոյ երեւեալ աստուածաբանիցն խորհրդազգածս առնէին զնոսա աստուածայնոցն , որպէս վեց պղծն է .

րեւեալ առ Եզեկիէլիւ ընդ իշխանութեամբ
կօցեալ՝ երևեցան առնոր զգեցեալէր զսլճո-
նաւորն և ունէր զկամարն ընդ մէջ առ ձայն
հրամանին Աստուծոյ, բացայայտեալ լինէր ։
« Ա՛նց, ասէ, դու ընդ մէջ քաղաքիդ Երուսաղէ-
մի և գիր նշան ՚ի ճակատ զղջացելոցն » և ցայլն
ասաց ։ « Գնացէք զհետնորա և կոտորեցէք » ոչ
զորս դուք կամիջէք, այլ զորս նա թողուցու
՚ի նշանագրելոց ։ Եւ դարձեալ « Որ զգեցեալ
էր զբազէնն փառաց և կայր ՚ի վերայ գե-
տոյն », զանազան տեսիլս կերպացուցանելով
Գանիէլի մարգարէի, սակայն զԹարգմանու-
թիւն տեսլանն ոչ ինքն յայտնաբանէր, այլ
խոնարհագունից քան վինքն հրամայէր զայս
առնել ։ « Գարրիէլ, իմացո՛, զտեսիլդ Գա-
նիէլի » ։ Եւ առ Զաքարիայիւ յերեւելն ունէր
՚ի ձեռին զձողաչափն և զլար շինուածոյն
՚ի վեհագունիցն գոլով հրեշտակական դա-
սուց և հրամանաւ՝ Զաքարիայի պատասխանէր ։
« Երթամ չափել զԵրուսաղէմ » ։ Եւ ոչ եւս
զկատարելագոյնն հատոյց մարգարէին զպա-
տասխանիսն վաղագոյն համարիլ զնա յիւրում
խօսակցութեան, մինչև այլ հրեշտակ եկն ընդ
առաջ նորա իբրև զսպասաւոր իւր ։ առ
որ հրամայեաց ։ « Ընթա՛, ասէ, և խօսեաց ընդ
երիտասարդին ընդ այնմիկ, թէ պողպղից բնա-
կեցէ Երուսաղէմ ՚ի բազմութենէ մարդ-
կան և անասնոց » ։

Եւ յԵզեկիէլ թէ. «Ձգեաց քերոր մի ըզ-
ձեռն իւր և էառ հուր և ետ 'ի ձեռն այլոյ և
նա ցանեաց 'ի վերայ քաղաքին» : Եւ 'ի Դանիէլն.
«Ել հրաման յառաջնոյ իշխանէն» , և այսորիկ
զիշխանաց եւ զիշխեցելոց նշանակեն : Բայց
տես զգուշութիւն Գրոց . զի ոչ երբէք զնոսա
թագաւորս կոչէ . այլ իշխանս և զօրավարս
զօրաց Տեառն եւ պետութիւնս եւ զօրու-
թիւնս նուաճեալ ընդ հզօր թագաւորու-
թեամբ միայնոյ եւ առաջին թագաւորին :
Չկնի ասացելոցս բեր . ըստ իոստմանն մերում
տեսցուք թէ յորմէ հետէ կամ զիւրոյ 'ի մար-
դիկ սկսաւ թագաւորութիւն :

Ի սկիզբն մարդկութեան շնորհեցաւ նմա այս
պատիւ . «Չի արար Աստուած զմարդն 'ի պատ-
կեր իւր . ըստ պատկերի Աստուծոյ արար զնա և
օրհնեաց զնոսա և ասէ իշխեցէք ձկանց ծովու
և թռչնոց և անասնոց ամենայնի' ոյ 'ի վե-
րայ երկրի» . և այսպէս թագաւորեցոյց զնա
երեւելի արարածոց ընդ թագաւորութեամբ
իւրով հնազանդիլ . զորմէ Դաւիթ ճառէ .
«Փառօք և պատուով պսակեցեր զնա և զա-
մենայն ինչ հնազանդ արարեր 'ի ներքոյ ոտից
նորա» : Այլ քանզի նա 'ի պատուի էր և ոչ
իմացաւ' անհնազանդ եղեալ Արարչին իւրոյ .
տնկաւ ընդ հնազանդութեամբ . որոյ իշխեցն .
որ և պաշտեաց իսկ զպարածս և ոչ զԱ-
րարչին . և մարմին լինելով զրկեցաւ 'ի շնոր-

հաց Հողւոյն՝ պաշտօնեայ եղեալ մեղացն՝ ծառայեաց նմին, ըստ Տեառն մերոյ հրամանին՝ թէ. « Որ առնէ զմեղս՝ ծառայէ մեղացոյ, որով և անկաւ մեղուցեալն ընդ մահու թագաւորութեամբ ։

Եւ յառաջանալ ժամանակին թէպէտ ազգ մարդկան իշխեին զգալեացս ամենայնի, սակայն ոչ որպէս ՚ի սկզբանն պարգևեցաւ նոցին ։ այլ դաւեալք և դաւաճանեալք հնազանդելոցն, և ՚ի վեր և ՚ի վայր Տեառն խառնակեալք ։ Վասն որոյ յորս մնաց կայծակն բարեպաշտութեան, թէպէտ և տիրեցին ազգաց, ոչ երբէք թագաւորական անուամբ բարգաւաճեալք պանծային ։ այլ զանձինս ՚ի շափունէին որպէս Արրահամ, և որ յառաջ քան զնա նահապետքն՝ Նոյ, Ենովք, Սէթ, և Ենովս ։ Իսկ այլք սմանք յաղագս կուրութեանն՝ որ էր ՚ի նոսա՝ իշխեցին ասել զինքեանս թագաւոր յաղագս ամբառնալոյն ՚ի վերայ համազգեացն ։ որպէս սկային ունի բան, զի միաբանեալք յաշտարակաշինութեան անդ հակառակ անբաւազոր կարողութեանն Աստուծոյ կանգնեին զամբարտաւանութեան ամբարտակն ։ Իսկ յորժամ հզոր ձեռամբ բարձրելոյն Աստուծոյ կործանեցաւ բուրդն բարձրաբերձ ՚ի քաղաքէ ։ այր զարամբ ելեալ հակառակէին տիրել ։ ըստ որում բռնացեալ Տիտանեանն Բել, որ նա ինքն է Ներ-

բովթ, կանգնեաց իւր ձեռն և իշխեաց 'ի վե-
րայ այլոցն, և որ թագաւորեալ ասացաւ, «Եւ
եղև սկիզբն թագաւորութեան նորա Բաբելոն
և Որէդ և Աքադ և Քաղանէ, որպէս ասէ Մով-
սէս մարգարէ, Յերկրէ յայնմանէ եւ Ասուր
և շինեաց զՆինուէ ո՛ր յորմէ ցեղեալք թագա-
ւորք Ասորեստանեայց, Նինոս և Նինուաս, որ
և Զամէս, մինչ 'ի Թկլադփաղասար և 'ի Սաղ-
մանասար, և 'ի Փուայ, և 'ի Սենեքերիմ, և
'ի սոցունց . . . Քաղդէացիք . 'ի Շամարով-
դաք Բաղդան որդի Բաղդան, և անդ մինչ 'ի
Նարուգոգոնոսոր և 'ի Բաղդասար, յորմէ թա-
գաւորութիւն նոցա բաժանեալ առւաւ Մա-
րաց և Պարսից : Արոց տիրեաց առաջին Դա-
րեհ որդի Արշուրայ 'ի զաւակէ Մարաց, և
Կիւրոս 'ի Պարսից՝ օծեալն, որք բռնակա-
լեալք Հայկինն զարմի, որ յետ սպանանելոյն
զիւլ, տիրեաց Հիւսիսային կողմանն և ամե-
նայն Արեւելից եւ ապա սպառեալ յառու-
րըս Արշակայ 'ի տէրանց նուաճեցան ընդ
իշխանութեամբ Պարսից մինչեւ ցԴարեհ
եւ Արտաշէս եւ Կամբիսոս, Քսերքսէս և
ցԴարեհ վերջին, զոր քակեաց Աղէքսանդր
Մակեդոնացի : Կացին և 'ի յուլով կողմանս և
'ի տեղիս բռնակալք, պիտակապէս կոչեցեալք
Թագաւորք յուլովք և անթիւք, զորոց լռելի-
է զանուանան, իբրեւ զարանց յառաջելոց 'ի
զօրութիւն բազկի իւրեանց, որք խլէցան

յարկացն Աստուծոյ և յերկիր կործանեցան և
Բայց ազգն աստուածածանօթք՝ Աբրահամ
Իսահակ և մեծն Իսրայէլ՝ Նահապետք եղեալ
Իշխեցին ազգին իւրեանց բազմաց, Թագա-
ւոր խոստովանելով իւրեանց զՃշմարիտ Թագա-
ւորն Աստուած, որպէս յայտ առնէ զայս Մով-
սէս յաղգաբանելն զԵդովմայեցիան, ասէ. «Այս
են Թագաւորք, որք Թագաւորեցին յԵդոմ,
մինչդեռ ոչ էր Թագաւոր յԻսրայէլոյ. և արք
ժանտք և ապերասանք այնպէս աղաւաղեցին
զայս մեծագոյն պատիւ, մինչ զի որ տիրէր մի
քաղաքի և փոքրագոյն տեղւոյ՝ Թագաւոր զին-
քըն կոչէր, որպէս հինգ Թագաւորքն հինգ
քաղաքացն Սողոմայ, որք մարտեան ընդ Գողգ-
գոմորեանսն, զորս վանեաց Աբրահամ, և սրչափ
Թագաւորք կարծեցան ՚ի Մովսիսէ, որ տիրեաց
վեց հարիւր հազար արանց ՚ի քսան ամէնից ՚ի
վեր մինչև ցվաթսունամեանսն Թուեալ. Թող
զոր այլ ևս աւելիքն էին և ոչ երբէք հապարտա-
ցաւ, կամ Թագաւորութեան շուք անձին
ըզձացաւ. վասն որոյ ՚ի Տեառնէ Աստուած
կարգեցաւ Փարաւոնի: Այլ և առ Յեսու,
որ նայն ժողովրդեանն խոնարհաբար առաջ
նորդէր, բազում գտցես և անթիւ անուան-
եալ Թագաւորք կոտորեալք ՚ի նմանէ, որպէս
Գիրն յայտնէ զԹագաւորն Երիքովի և ըզ-
Թագաւորն Գայեայ որ և զԱդոնիբեզէկ Թա-
գաւոր ըմբռնէ ալ կոտորեաց զտոնորաւ զձեռս

և նա ասաց, «Եթե անասունն թագաւորք ծայրակտորք ոտիւք և ձեռք ուտէին 'ի սեղանի խմւմարդ' որպէս արարի, եղև ինձո: Իսկ ազգն և ժողովուրդն Աստուծոյ թէպէտ յամենայն անսակս մեղաց խոտորէին, այլ յայսմիկ առաւել եւս զգուշանային Աստուծոյ միայնոյ շնորհելով զթագաւորութիւն եւ զիշխանութիւն, ինքեանք հովուելով ժողովրդեանն, որպէս Գեղէոն, յորժամ ասացին ցնա որդիքն Իսրայելի թէ. «Իշխեա՛ գու մեզ և որդիք քո: Նա պատասխանի ետ և ասէ. «Ոչ իշխեցից ձեզ ես և ոչ որդի իմ, այլ իշխեսցէ ձեզ Տէր Աստուած»: Ասան որոյ ախորժելի էր այս Աստուծոյ և հաճեալ էր ընդ սոյն. քանզի համազօր էր մտածութիւնս այս սկկզբնաւորական պատուոյ թագաւորութեան, զոր շնորհեաց մարդոյն աիրել արարածոց և լինել 'ի ներքոյ թագաւորութեան Աստուծոյ եւ զնա միայն ճանաչել թագաւոր:

Արդ ուզիղ և բարեպաշտ սահմանադրութիւնս այս 'ի ժողովուրդ Աստուծոյ' յԻսրայելէ եհաս մինչև 'ի Սամուէլ մարգարէ, և յայնժամ որպէս զամենայն չարիս ուսեալք 'ի հեթանոսաց' գործեցին այսպէս և յայսմիկ նախանձեալ մատեան առ Սամուէլ մարգարէ և ասեն. «Տուր միզ թագաւոր, որպէս ունին ամենայն ազգ հեթանոսաց»: և չար թուեցաւ յաչս Սամուէլի. վրսն որոյ ասաց առ նա Առ.

տուած . « Ոչ եթէ զքեզ , այլ զէս անարգեցին շթագաւորել 'ի վերայ ինքեանց . արգ ա՛նւր նոցա թագաւոր . բայց ասա՛ նոցա զիրաւունս թագաւորի » , և ժողովեալ զնոսա Սամուէլ ասաց . « Գիտասցիք . զի Տէր Աստուած եհան զձեզ յԵգիպտոսէ . արար ձեզ զամենայն բարութիւնս , և դուք անարգեցիք զնա չի՛նել թագաւոր 'ի վերայ ձեր : Եւ արգ լուարուք զիրաւունս թագաւորի . զուստերս ձեր աւցէ և արարցէ իւր կառավարս և զհեծեալս և սուրհանդակս և զօրականս և մշակս , կթել զկութս իւր , հնձել զհունձս իւր . և զդասերս ձեր՝ յիւղեփեացս , հացարարս և խորակարարս : զընտիր այգիս ձեր և զթզենիս աւցէ և աղաղակեսցիք յերեսաց թագաւորին ձերոյ առ Տէր և ոչ լուիցէ ձեզ » :

Զայս ասէր Սամուէլ հրամանաւն Աստուծոյ , զի թերեւս զարհուրեալք արգեցին 'ի խնդրոյն . և նոքա ասեն : Զամենայն յանձին կալցուք , միայն ա՛նւր մեզ թագաւոր . և էօժ նա զՍաւուղ որդի Ափսեայ յազգէ Բենիամինի , որ թէպէտ խաղաց 'ի վերայ նորա Հոգի Աստուծոյ և մարգարեանայր . սակայն յառակս նախատանաց եղև թէ , « Եւ Սաւուղ 'ի մարգարեսո՞ր յետոյ վերացաւ 'ի նմանէ Հոգի Տեառն , և այս չար խեղդեր զնա և զանպատշաճ խնդիրն իսրայելի յայտ արար Սամուէլ , զի ժողովեալ զամենայն իսրայել եկաց

յաղօթս և 'ի ժամ հնձոց ետ Տէր ձայն ու
բոտման և կարկուտ . և աղաղակեալ որդւոցն
Իսրայելի , եկաց յաղօթս Սամուէլ և դագա-
րեցին արկածքն , և Սաւուղ գտաւ շար վա-
սըն որոյ ատեցեալ եղեւ 'ի Տեառնէ . զի թէ-
պէտ եբարձ զվհուկս Եիսրայելէ , սակայն ին-
քըն հմայէր , որպէս ասէր առ նա Սամուէլ
թէ . « Հմայքն մեղք են եւ ցաւս եւ աշխա-
տութիւնս ամէ թերափոյ 'ի վերայս . այլ և յե-
տոյ զվհուկն հարցանէր . վասն որոյ մերժեալ
խոտեցաւ 'ի Տեառնէ շթագաւորել . և թէ-
պէտ քառասուն ամ թագաւորեաց 'ի վերայ
Իսրայելի որպէս յայտ առնէ Պօղոս 'ի Գործս
Առաքելոցն , սակայն զի շէր ըստ հաճոյիցն . այլ
յանօրէնութեան և 'ի բռնութեան կարգի հա-
մարելով Գիրն ասէ . « Որդի տարւոր էր Սա-
ւուղ 'ի թագաւորելն իւրում և երկուս ամս
թագաւորեաց Իսրայելի ո . այսինքն թէ զեր-
կուս ամս՝ որ իբրև զտարեւոր աղայ՝ անմեղ
էր 'ի շարեաց և աննենգ , այն էր թագաւո-
րութիւն ըստ Աստուծոյ . վասն որոյ որպէս
ծտոք և մանաւանդ թղենի արտաքոյ սահմա-
նաւոր ժամանակի նախկին ընձիւղեալ պը-
տուղքն սին և թափուր լինին , այսպէս և ար-
տաքոյ իրաւանցն՝ որ Աստուծոյ եղեալ իբք ,
մինչեւ ինքն հաճեալ որբեոցէ զիրան , որ-
պէս ամուսնութեան Ադամայ՝ նախկին կային
և թագաւոր խնդրելոյն Իսրայելի՝ Սաւուղ :

ար և մերժեցաւ 'ի Տեառնէ . և ապա զարտու-
զորէն խնդիր նոցա արեալ Աստուծոյ , ինքն
կամեցաւ տալ նոցա թագաւոր և ետ զԴա-
ւիթ որդի Յեսսեայ՝ ըստ աստուածային կա-
մաց իւրոց թագաւոր . զի այլ է թագաւորն՝
որ Աստուծոյ . և այլ՝ որ 'ի մարդկանէ , որպէս
ինքն ասէր առ Սամուէլ . «Երթ 'ի Բեթղէմէմ՝
առ Յեսսէ , զի տեսի ես յորդուոց նորա թագա-
ւորել ինձ 'ի թագաւոր» . և թէ . «Գտի զԴաւիթ
որդի Յեսսեայ այր ըստ սրտի իմոյ , որ արաս-
ցէ զամենայն կամս իմոյ : Եւ այսպէս Գիրն Աս-
տուածային այլ անուամբ նշանակէ զթագա-
ւորն Աստուծոյ և այլով զաշխարհական՝ որ-
պէս Աբիմելէք արքայ Գերարացւոց եւ Փա-
րաւոն թագաւոր Եգիպտոսի 'ի տեղւոյն նը-
շանակեալ : Իսկ զՄելքիսեդեկէ Պողոս ասէ .
«Նախ թարգմանի թագաւոր արդարութեան ,
ասլա թագաւոր խաղաղութեան » . և ոչ միայն
յաստուածայնոց Գրոց է ուսանել , այլ և լսկ 'ի
մարդկանէ , որպէս որդիքն Քետայ ասէին
ցԱբրահամ . « Լոր , թագաւոր ոմն ետ գու 'ի
միջի մերում » . ուստի վասն այսորիկ զԴաւիթ
ըստ կամաց իւրոց գտեալ թագաւորեցոց . զի ե-
զիցի նա հայր և օրինակ թագաւորաց բարեպաշ-
տութեամբ և ամենայն բարեգործութեամբ ,
զի որք ըստ նորայն շաւղաց գնասցեն , ոչ են
'ի մարդկանէ թագաւորք . այլ յ Աստուծոյ կար-
գեալք և 'ի ներքոյ ամենակալ թագաւորու .

Թեամբ նորա նուաճեալք, որպէս եւ զայս
գիրն յայտնէ. զի զորս վիպասանէ 'ի Թա-
գաւորացն, ասէ. Գնաց 'ի ճանադարհս Թա-
գաւորի հօր իւրոյ. և զորս եպերէ՝ ասէ.
Ո՛չ գնաց նա ընդ շաւիղս Դաւթի. այլ եղև
զհետ խտորելեաց Աստուծոյ, տանն Յերով-
բովամու և Աքաաբու. և այնչափ հաճեալ ընդ
Դաւիթ, մինչ զի փառաւորեաց զնա 'ի կեա-
նըս և զկնի մահու. և յանուն նորա զբա-
րիս ունէր՝ որոց ախորժէր. որպէս ասէր առ
բաղումս և առ Եղէկիաս՝ Թէ. « Վերսկա-
ցու եղէց քաղաքիդ այդմիկ վասն իմ եւ
վասն Դաւթի ծառայի իմոյ. զի Թէպէտ չար-
չարեցաւ նա 'ի Թշնամեաց՝ յիւրոց եւ յար-
տաքնոց, սակայն ուղիղ հաւատովն՝ որ յաղ-
թեաց ամենեցուն, և Թէպէտ մեռաւ, ընկալաւ
'ի ձեռանէ Տեառն կրկին զհատուցումն: Սա-
կայն ոչ այնու բաւականացաւ, այլ և ան-
ձամբ զանձն պատուհասեաց. լայր 'ի մահիճսն
և արտասուօքն զանկողինսն Թանայր: Արդ՝
զսա Թագաւորեցուցեալ Աստուծոյ՝ ուսոյց
այսպէս Թագաւորել, որ է ըստ նորին կամա-
ցն. և արտաքոյ եղեալն այսորիկ՝ ընդդէմ է
հաճոյիցն, մարդկան չարութեան գիւտք, որ-
պէս 'ի խնդրելն Խարայելի Թագաւոր, միշտ ա-
սէր Աստուած զամբարշտութիւն նոցա, առ
ամաչեցուցանել զնոսա որպէս Ովսէիւ ասէր.
«Ո՛ւր է Թագաւորն քո, զորմէ ասացեր, տուր

ինձ թագաւորո՞ւնա փրկեսցէ զքեզ և յամենայն քաղաքս քո իրաւ արասցէ քեզ, և դարձեալ՝ « Ետու քեզ թագաւոր բարկութեամբ իմով և կարճեցի սրտմտութեամբ իմով » . և դարձեալ . Անձամբ թագաւորեցին և ոչ ինեւ տիրեցին , և ոչ ցուցին ինձ իսկ ըստ ճանապարհին Դաւթի թագաւորեցելոյն , ինքեամբ ասէր թագաւորել : Գիտելի է զի ոչ միայն զբարեպաշտան , այլ և զումանս 'ի հեթանոսաց վասն կատարելոյ զկաման Աստուծոյ , և վասրն յազեցուցանելոյ բարկութեան զսրտմտութիւն նորա 'ի մեղուցեալսն , և ևս վասրն բարութիւնս ոմանց առնելոյ՝ ինքեամբ ասէր զթագաւորելն նոցա , որպէս վասն Էփրոսի Պարսկի ասէր . « Ես յարուցից զնա արդարութեամբ թագաւոր » , և զպատճառն յայտնէ . « Նա շինեսցէ զքաղաքն իմ' սուրբ , և դարձուցէ զգերութիւն ժողովրդեան իմոյ » . զորմէ Եսասաս գրէ . « Այսպէս ասէ Տէր Աստուած ցօծեալն իւր ցկիւրոս » , և վասն տանջելոյ զԻսրայէլ և զայլս յաղագս մեղաց իւրեանց , բաժակ ոսկի կոչէ զՆաբուգոդոնոսոր եւ ուռն ոսկի , և թէ . « Ազգ և թագաւորութիւն , որ ոչ ծառայեսցէ Նաբուգոդոնոսորայ , ես Տէր 'ի վերայ ազգին այնորիկ , և ամից զճառայն իմ զՆաբուգոդոնոսոր 'ի վերայ Երուսաղէմի » : Այլ զի ոչ ներելով արար նա զտանջանն 'ի վերայ Իսրայելի , ըս-

պառնացաւ 'ի վերայ նորա Աստուծո՞ւ , « Ես
բարկացեալ էի ժողովրդեան իմոյ , և զի դու
ոչ արարեր որդրմութիւն , ահաւասիկ յա-
րուցանեմ 'ի վերայ ձեր զՄարս » . ընդ որս եկին
և Պարսիկք ազատել զԻսրայել և բառնալ ըզ-
ղաւակն Քաղդէացւոց , յորոց էր Պարսիկն Աիւ-
րոս օծեալն Աստուծոյ , զորմէ ասէր . « Ես
երթայց յառաջի նորա , զլերինս հարթեցից և
զգանձս աներեւոյթս ցուցից նմա » :

Այլ և վասն այսր պատճառի փայտատ և
և սղոց 'ի ձեռս իւր կոչէր զՍենեքերիմ , և
զի հպարտացեալ հայհոյեաց զնա 'ի դուռն Ե-
րուսաղէմի , անդ կործանեցան զօրքն նորա ,
և ինքն յորդուցն իւրոց սպանաւ առաջի կռո-
ցն իւրոց : Յորմէ իմանամք , զի թէպէտ
և բարեպաշտքն նովաւ թագաւորեալք , այլ
ոչ եթէ ամբարիշտքն ընդդէմ եւ հակառակ
նմա իբր թէ ինքեանց զօրութեամբ յայն վի-
ճակեալք և բռնակալեալք , այլ 'ի նորին թոյլ
տալոյ , վասն իրիք անօրէնութեան . և սոյն-
պէս առաջին թագաւորութիւն և նահապե-
տութիւն որպէս յերկինս , սոյնպէս և յերկրի
'ի նմանէ է և անուանի , ըստ ձայնին Պօղո-
սի , այլ եւ Սողոմոնի՝ որ ասէ . « Լուարուք
թագաւորք , զի 'ի Տեառնէ տուաւ ձեզ թա-
գաւորութիւնդ և հարստութիւնդ 'ի բարձրե-
լոյն » . և նոյն ինքն իմաստութիւնն Հօր Քրիս-
տոս ասէ՝ յառակաւոր բանն Սողոմոնի՝ թէ .

« Ինեւ Թագաւորք Թագաւորեն , և բռունք
ինեւ ունին զերկիր » :

Արդ այսոքիկ առ այն բաւական լիցին՝ Թէ
յորմէ՞ հետէ եւ զիարդ սկսաւ Թագաւորու-
թիւնն 'ի մարդիկ : Եւ մնայ մեզ պատմել այ-
սուհետեւ զկարգ և զկենցաղավարութիւն և
զգործ և զիրաւունս Թագաւորի :

Զի որպէս ամենայն հասակի եւ կարգի
սրատշաճագոյն խրատ աննախանձ և առա-
տաբար ընծայեն Գիրք Աստուածաշունչք ,
այսպէս և Թագաւորաց , և եւս առաւել քան
զայլոցն , ըստ նախագահութեան պատուոյն
և աստիճանին մատուցանեն խրատս և սահ-
մանս կենցաղավարութեան . քաջ գիտելով զի
բարութիւնն նոցա բաղմաց , և չարութիւնն նո-
ցա յոլովից հասանէ : Ասան որոյ պարտ եւ
արժան է պսակիլ Թագաւորի բարեպաշտու-
թեամբ , խոնարհութեամբ , հեղութեամբ ,
իմաստութեամբ , զգաստութեամբ , արդարու-
թեամբ , ճշմարտութեամբ : Եւ արդ բացա-
յայտեսցուք զգլխաւորաբար եղեալս : Նախ
իբրև զհիմն ինչ պիտանի է Թագաւորի բա-
րեպաշտութիւնն՝ որ առաւել Թագապաճոյճ
կազմէ զնա քան զականս պատուականս՝ շքե-
ղապոյն քան զտերութիւն բազում աշխար-
հաց . ճշմարտագոյն հաւատով սիրել զԱս-
տուած յամենայն սրտէ և 'ի զօրութենէ և 'ի
նորին օգնականութիւն վստահանալ և յա-

մենազոր անուն նորա խրախոյս բառնալ . 'ի
բազում նորա յուսալ և նովաւ զամենայն ինչ
վճարել . պանծալ որպէս օրինակն և նախնին
բարեպաշտ թագաւորաց Իաւիթ , զի զոր ինչ
առհօտս ոչխարացն գործէր , զնոյն և 'ի թագա-
ւորութեան , զի ցուցցի առանց ծածկութեան
հաւատն . ըստ որում 'ի մանկութենէ յուսու-
վըն և հաւատովն՝ որ առ Աստուած՝ յաղթէր
գազանաց և հսկայից , այսպէս և 'ի թագա-
ւորութեանն ամենայն թշնամեաց իւրոց , որ
ոչ երբէք յուսացեալ եղեւ յայլ ոք , բայց մի-
այն 'ի Տէր Աստուած . ոչ 'ի կուռս որպէս
և պարծէրն համարձակ՝ թէ . “ Մոռացեսո՞ւ իցէ
մեր զանուն Աստուծոյ մերոյ կամ ձգեսո՞ւ իցէ
զձեռս մեր յաստուածս օտարս : Աստուած խրն-
դրէ զայս , որ քննէ զգաղտնիս սրտից մերոց ” :
Ոչ ապաւինեցաւ 'ի կուռս և յերիվարս , որպէս
ասաց . “ Ոչ թէ յաղեղն իմ յուսացեալ եմ , և
ոչ սուր իմ կեցուցանէ զիս , այլ աչքո և բա-
զումք և լոյս երեսաց քոց ” . և թէ . “ Սուտ
է ձի 'ի փրկութեան իւրում , 'ի բազում զօ-
րութեան իւրում ոչ ապրեցուցէ զհեծեալն :
Աչք Տեառն 'ի վերայ երկիւղածաց իւրոց ,
Փրկել 'ի մահուանէ զանձինս նոցա , և ոչ թէ
ընդ զօրութիւն ձիոյ կամեցաւ Տէր և ոչ ընդ
իրանս առն հսկայի հաճեցաւ . այլ հաճեցաւ
յերկիւղածս իւր և յայնոսիկ , որք յուսան յս-
ղորմութիւն նորա ” : Այլ և ոչ 'ի մեծութիւն

7

Generated on 2017-11-07 11:37 GMT / http://hdl.handle.net/2027/uc1.b0000070938
Public Domain, Google-digitized / http://www.hathitrust.org/access_use#pd-google

Թագաւորութեան իւրոյ ապաստան եղև՝ որ
ասէրն . « Պանդուխտ եմ ես և անցաւոր » ,
և թէ . « Ես աղքատ և անանկ եմ » , և թէ
« Տէր, հան՛ի բանտէ զանձն իմ » , այլ մեծաւ
յուսով և հաւատով յԱստուած խրախուսեալ,
նովաւ զամենայն զինչ առնէր, ևս զեղանակ սիրոյ
նորա առ Աստուած՝ ի նորին բանից անտի ծա-
նիցես , այլ և ՚ի դործոց, ըստ որում յայանէր
զԱստուած, զԱստուածն անձուկ սիրոյն . « Որ-
պէս փափագի եղջերու յաղբերս ջուրց , այնպէս
փափագի անձն իմ առ քեզ Աստուած » , և թէ .
« Ծարաւի է անձն իմ առ քեզ Աստուած , երբ
եկից երեւեցայց երեսաց քոց » , և այլ յուլիս ման
սոցին , պատկեր յոյժ և նախ քան զամենայն
ինչ զտունն Աստուծոյ և տեղի յարկի փառաց
նորա , վասն որոյ և ասէր առ Նաթան . « Ես
բնակեմ ՚ի տան եղեւնափայտեայ և տապա-
նակն Աստուծոյ արտաքոյ կացցէ՞ » . մինչեւ
՚ի Տեառնէ արգելաւ ոչ շինել , սակայն իւրնդ-
րեաց գտանել զյարկան Աստուծոյ Յակով-
բայ : Նա և Սողոմոն շինեաց նմա տուն ըզ-
հռչակաւորն և զերեւելին , սակայն Իսաիթ ՚ի
տան հանգոյց զնա և կարգեաց երգս և պաշ-
տօնեայս : Եւ յորժամ հալածեալն լինէր յԱ-
բիտղոմայ որդւոյ իւրոյ , ոչ թողացոյց քահա-
նայիցն զտապանակն Աստուծոյ ընդ նմա չըջե-
ցուցանել , այլ ասաց . « Իարձուցէք զգա՛ի տեղի
իւր , եթէ հաճեցի ընդ իս Տէր , ցուցցէ միւս

անգամ ինձ զդա և զվայելութիւն դորա ։
Այլ եւ Սողոմոն իբրեւ զժառանգութիւն
ինչ զբարեպաշտութիւն փոխանորդեալ 'ի
հօրէն 'ի սկիզբն թագաւորութեան իւրոյ ։
ոչ զայլ ինչ ըղձացաւ առնուլ 'ի Տեառնէ քան
զիմաստութեան շնորհ յարգարարատութիւնս
և շինեաց զտունն Աստուծոյ ։ Թէպէտ եւ
յետոյ սխալեցաւ ։

Զինչ և զԵզեկիա հրաշափառագոյն եցոյց
'ի թագաւորութեան իւրում ։ քան թէ 'ի բո-
լոր սրտէ յուսացաւ 'ի Տէր ։ եբարձ զբար-
ձունսն ։ զբազմաժամանակեոյ արձան շարու-
թեան զօճն պղընձի՝ զոր արարն՝ խորտակեաց ։
զոր մինչև ցայ՛նժամ պաշտէին որդիքն իսրայ-
ելի եւ անուանէին զանուն նորա Նեեա-
թան ։ վասն որոյ այսպիսի հաւատոյ յուսոյ
և սիրոյ՝ որ առ Աստուած՝ յաղթանակ ըն-
կալաւ զտէրութիւն 'ի վերայ թշնամեաց իւ-
րոց ։ և աղօթիւք հերքեաց զզօրսն Ատորւոյն
Սենեքերիմայ ։ եւ զանհրաժեշտ հրամանն
Տեառն ։ որ եհատ 'ի վերայ նորա զվճիռ մա-
հու ։ արտասուօքն ընկրկեալ յետս նահան-
ջեաց ։ յաւել յաւուրս իւր հնգետասան ։ Ոչ
փոքր ինչ արդեօք էր և Յովսիայ բարեպաշ-
տութիւնն՝ որ իբրեւ էած առ նա Քեղկիաս
քահանայ զմատեան օրինացն թագուցեալ 'ի
Տաճարին ։ պատառեաց զպատմութեանն ։ խընդ-
բեաց 'ի բոլոր սրտէ զՏէր Աստուած իսրայել-

լի : Եւ առաքեաց իւր Ողորդա կին մարգարէութի ազօշեւ զՏէր եւ այնքան վրէժխընդիր եղեւ օրինացն , մինչ զի զոսկերս ամբարշտեւրոցն հանեալ այրեաց 'ի վերայ գերեզմանացն իւրեանց : Պատուեաց զպաշտօնեայսն Աստուծոյ և զքահանայս . զի այսու հաճեալ լինէր բարեպաշտութիւնն 'ի Թագաւորսս որպէս եւ վասն Յովասու Թագաւորին ասէ Գիրն՝ Թէ . « Բարեպաշտեցաւ Յովաս որչափ լուսաւորեաց զնա Յովիգայ քահանայ և յաղթող գտաւ ամենայն ներհակաց իւրոց » : Բազումն եւ յուրմա գտցես 'ի Թագաւորաց այսու պայծառացեալ որպէս 'ի հնումն , այսպէս և 'ի նորումն Կոստանդիանոս , Թէոդոս . Տրդատ , և այլք , որովք յայտ է զի վայելուչ է ամենայն Թագաւորի ամբիծ հաւատով բեւեռիլ յերկիւղն Աստուծոյ և 'ի սէր . և Թէպէտ ստանալ յաշխարհին պէտս , փառս և բաղմութիւն զօրաց . զի ըստ Սողոմոնի . « Ի բազում զօրս փառք Թագաւորի , սակայն աւնուն և 'ի փառսն Աստուծոյ ապաստան լինել ամենեցուն զակն 'ի բաց դարձուցանել և զնա միայն ճանաչել » :

Զի 'Թէ և այժմ ոչ է կուսպաշտութիւն յատուկ , այլ յուրմա և բազումք , գոն պատրուակաւ . միմիայն զագահութիւն առցես , որ է երկրորդ կուսպաշտութիւն , այլ և զամենայն հմայս եւ զնախագիտութիւնս : Աստն որոյ

հարկ է թագաւորի, և ամենայն առն բարե-
պաշտի՝ յախտէս յայսմանէ՝ ՚ի բաց կալ:

Նախ յաստեղագիտութենէ, և յայնպի-
սեայն հմայողաց. ոչ միայն ամբարշտութիւն
զայնպիսեացն գեգերմունան համարել, այլ և
անմտութիւն յոյժ. քանզի թէ ըստ նսցուն ա-
սացելոցն՝ ծնեալքն յաստեղս չար և բարի գոն
և ՚ի նոցին հայեցողութենէ լինի աշխարհի լաւն
և վատթարն. և եթէ ամենայն ինչ ՚ի հար-
կէն ըստ բախտի եւ ըստ ճակատագրին լի-
նի, ապա ո՛չ գոյ անձնիշխանութիւն: Եւ
անիրաւ են օրէնք և պատուիրանք՝ որ Աս-
տուծոյ է եղեալ՝ և իրատաւորաց: Զի զան-
կարելիսն հրաժարեցուցին, և ոչ է իրաւայի
պատիժ չարագործաց եւ պատիւ բարեգոր-
ծաց, ոչ աստ և ոչ ՚ի հանդերձեայն: Եւ
զի՞նչ պիտոյ էր այլ օր և հատուցումն: Եւ
վասն էր մաղթել զԱստուած, և կամ զի՞նչ
խնդրել ՚ի նմանէ, այլ նոցա տալ պաշտօն՝ որք
կարեն առնել ինչ: Այլ ուղղաց սրտից ա-
նարժան և ունայն համարին այսպիսի ասա-
ցութիւնք. եւ գիտել միայն զաստեղս՝
ըստ հրամանի գրոյն լինել լուսատու երկրի՝
եւ նշանս աւուրց, ամսաց եւ ժամանա-
կաց և ամաց: Եւ առաւելքան զայս խոտել
կարծիս. ըստ որում ասաց Աստուած ՚ի ձե-
ռն Ովսէ մարգարէի. « Ես եմ Աստուած՝ որ
հաստատեցի զերկինս և զօրս, այս է՝ զաս-

տեղս : և ոչ ասացի քեզ երթալ զհետ նո-
ցաո : Եւ Եսայի հեզնէ , « Ո՛ր են աստե-
ղագէտքն քո՝ յարիցեն և ապրեցուցեն ըզ-
քեզոյ յետ որոյ և՛ի սոցունց ճանաչել արժան
է զստուծիւն աստեղանշմարից . զի ծնեալք
իւրաքանչիւր աստղ որպէսն նոքա ասեն .
եւ յայլ և յայլ բախտ և ճակատագիր վիճա-
կեալ : Եւ ՚ի միում տան ՚ի շարժէ սատակե-
ցան , կամ ՚ի միումն ՚ի պատառմանէ երկրի
ընկղմեցան , կամ ՚ի մի նաւ ընկղմեցան . զի
զոր ինչ համարելի է՝ որ ՚ի բազում բախտ
ճակատապրեալ յայլ և յայլ աստեղս և ՚ի մի
վախճան առին զկատարումն :

Զկնի սոցին զգուշութեանց արժան է
ոչ ընդունել զքարընկէցս , զգարընկէցս ,
զբժահայեացս , զպլիւրադիւթս , զգարէ-
դիւթս , զհաւահմայս , զըրդահմայս , և ըզ-
կուիչս և զթռիչս , և զբառաչիւն , և զբա-
չիւն անասնոց խտրեն . և զայլսն եւս , և ոչ
միայն յայսցանէ , այլ և ՚ի բարիոք կարծե-
ցելոցն վիճակաց ՚ի բաց լինել . բայց միայն
թէ ազօթիւք խնդրել ՚ի Տեառնէ վիճակաւ
յայտնութիւն . որպէս եղեւ առ Յովնանու ,
եւ ՚ի վիճակաւ ընտրութեանն Մատաթիայ ,
եւ որպէս զեփուտն կտաւ ի առ Դաւիթ :
Եւ զայսոսիկ ոչ փորձութեան աղագաւ , զի
գրեալ է . « Մի՛ փորձեցես զՏէր Աստուած
քո » . այլ միայն վասն յայտնութեան ճշշ

4

մարտութեանն : Իսկ զայլ տեսական թողուլ
իրբեւ զվնասակարս , և զմասունս կռապաշ-
տութեան , զի հմայքն մեղք են , սսէ Գիրն
Աստուածային :

Եւ ըստ ասացելոցս զտրդարեալ թագաւոր
գտանի ամենեցուն յաղթող . այլ և յամենայն
իրս անուանի և փառաւոր . քաղի բարեպաշ-
տութիւն և սէր առ Աստուած ոչ զթագա-
ւորս միայն . այլ և զըամիկս անուանի գոր-
ծէ . զի ո՛ր էր և զի՛նչ բազմամբոին Քսերքսէս
առ ձկնորսն Յովհաննէս . եւ Դարեհ վշտաս-
պեան՝ և Արտաշէս քաջ՝ առ տկարն Պօղոս :
Եւ զի մի զառաքեալսն ՚ի նշանացն և ՚ի պայ-
ծառագոյն վարուցն անուանիս և հռչակաւո-
րրս կարծիցես լինել : Տէ՛ս զեւան վստա-
հագոյնս եւ բարեպաշտելոցն առ Աստուած
անուանի եղեալ՝ ընդ աւետարանին խօսել ա-
նըսպառ զգործ նորա ՚ի յիշատակ նորին : Նս
եւ խոնարհութիւն հռչակել՝ եւս բարձրա-
գոյն գործէ զթագաւոր . որպէս նորին ընդ-
գիմակն յերկիր անկեալ և նուաստագոյն , որ
եւ երեւի առ Մովսէս՝ Փարաւոն , և Նա-
բուգոդոնոսոր՝ առ Իանիէլ . եւ Սենեքե-
րիմ՝ առ Եզեկիայ . եւ յայլս յոլովս : Ըստ
որում Տէրն հրամայէ , “ Ար խոնարհեցուցանէ
զանձն՝ բարձրացի , եւ որ բարձրացուցանէ
զանձն՝ խոնարհեցի ” : Եւ առաքեալն Պետ-
րոս թէ , “ խոնարհեցարուք ընդ հզոր ձե .

աւմբն Աստուծոյ , զի զձեզ բարձրացուցէ ,
'ի ժամանակի ո' , զի « Թէ որ հպարտանայ 'ի
դատաստան սատանայի անկցի » , որպէս եւ
գրեալ է Պօղոս : Յայտ է թէ՛ որ բարձր գո-
լով խոնարհեսցի , կցորդ փառաց լիցի այնմ՝ որ
'ի գերակայ բարձրութենէ փառացն թափե-
ցաւ 'ի մեր նուաստութիւնս , և անճառ խո-
նարհութեամբ զկերպարանս ծառայի զգե-
ցաւ : Յոլովք են խոնարհութեան քարոզք
թագաւորաց :

Ի ՎԱԽՃԱՆ բանիցս կամելով կատարու-
մին առնել կանոնական խրատուցս , հա-
մարեսցուք մեծագոյն տուգանս կրել , եթէ
զհարկաւորն և որ գլուխն է ամենայն բարու-
թեանց լռեսցուք , ոյ է դատաստանի իրաւանցն
բան : Զի թագաւոր , որ ինդրէ 'ի հաստատու-
թեան կալ , զհետ ելթիցէ արդար դատաս-
տանի և ուղիղ իրաւանց՝ ըստ որում ասէ Սո-
ղոմոն . « Թագաւոր արդար կանգնէ զաշ-
խարհո : Եւ թէ « Թագաւոր որ արդարութեամբ
դատի , աթոռ նորա 'ի վկայութիւն հաստա-
տեսցի , և արդար դատաստան լինի՝ յերկայ-
նագոյն քննութենէ » : Ճշկրիտ 'ի վերայ հա-
սանել . մի հակիրճ և համառօտ առնել զի-
րաւունս , յաղագս ձանձրութեան եւ կամ
յաղագս հատու և սուք երեւելոյ . քանզի
զայս ոչ վայելէ մարդկան առնել որոց կարծո .

ղաղատ և կատկածավճիռ է ատեան դատաստանին . այլ մեծապէս քննութեամբ և աշխատասիրաբար հասու լինել :

Տէ՛ս զամենագէտն , որ զանգործսն տեսաւ .
նէ՛ զի ասէր առ Արրահամ թէ . « Աղաղակ Սողոմայեցւոցն եւ Քոմորացւոցն ել առաջի իմ . արդ իջեալ տեսից թէ ըստ աղաղակին՝ որ յիս հատանէ՛ վճարեսցե՛ն . ապա թէ ոչ , գիտացից » : Եւ ո՞յք էին՝ որ բողոքէին առ Աստուած զչար գործոցն Սողոմայ , եթէ ոչ հրեշտակքն պահապանք նոցա . զի ե՛ն կարգեալ յարարչէն ամենայն ազգի և անձին առհասարակ , որք ականեն զգործս մարդկան և հանեն առ Աստուած զչար և զբարի՝ որպէս յայտ է ՚ի բազում գիրս : Եւ Տէրն իսկ ասէ թէ . « Մի՛ արհամարհէք զմի ՚ի փոքրկանց աստի՛ զի հրեշտակք նոցա հանապազ տեսանեն զերես Հօր իմոյ՝ որ յերկինս է » : Եւ առ կուռնէլիս՝ իւր հրեշտակն ասէր . « կուռնէլի՛ , աղօթք քո և ողորմութիւնք յիշեցան առաջի Աստուծոյ » . յայտ է թէ ՚ի նմանէ : Այսպէս և Սողոմայեցւոց հրեշտակքն բողոքեցին զչար գործոց նոցա և Աստուած իբրուկերպարանէր յերկբայս լինել : Արդ բողոքէչքըն հրեշտակք՝ յորս ոչ գոյ նախանձ և ոտութիւն . եւ լսէրն Աստուած եւ ՚ի քննութիւն իջանէր և որպէս տկար և ոսկաւածու մանակեայ յառնէ ամբարշտէ լուեալ շարախօ .

տութիւն՝ հաստատէ ։ Ո՞վ ոչ գիտէ զմարդիկ ։
զի ոչ խնայեն 'ի միմեանս ։ Որ թէ քան զայլս
գտանէին զօրեղագոյն՝ և 'ի վերայ Աստուծոյ
յանդգնէին ։ Ըստ որում գտցես զՀրէայս առ
Քրիստոսիւ կատաղեալ ։ Վասն որոյ ոչ է
պարտ թագաւորի 'ի լսելն միայն հաւատալ
չարախօսութեան ։ այլ յոյժ քննել որպէս և
Աստուած զինքն օրինակ եղ դատաւորացն՝
քննելով զՍողոմոնայեցիսն ։

Զի թէ թագաւոր սիրէ զառունկնաճառս
և զարս մատնիչսն, յայն աճեն մարդիկ և զնոյն
միշտ առնեն, որպէս ասէ Սողոմոն ։ « Թա-
գաւոր ։ որ հաւանի բանից անօրէնութեան ։
ամենեքեան՝ որ զնովաւ են, անօրէնք են » ։
Այլ 'ի լսելն զհակառակութիւն զմիմեանց ։
երկայնմտութեամբ և հեղութեամբ լուիցէ ։
և բազմօքն քննեցէ ։ և վկայիւք ստուգե-
ցէ ։ այլ և աղօթիւք խնդրեցէ 'ի Տեառնի
զյայտնութիւն իրին ։

Եւ յորժամ ըստ կարողութեան 'ի վերայ
հասցէ իրաւանցն առանց խղճմտութեան եւ
թերութեան, յայնժամ և ոչ ընդ միոյ իրաց
մի՞ իսպիանեցէ և վաճառեցէ զճշմարտու-
թիւնն ։ Այլ և անփորձ գտցի արծաթոյ՝ ո-
րում ամոք լսէ ։ քանզի յաղթութիւն և ըզ-
պատիւ ստանայ՝ որ զկաշառօն տայ ։ Բայց
զհոգին առողջին ապականէ, ասէ Սողոմոն ։
Այլ թագաւոր՝ որ ախորժէ անսասանելի մը-

նալ յաւիտեան՝ կաշառ 'ի վերայ իրաւանց մի՛
առցէ : Կետեւելով Դաւթի . « Զի հուր սյ-
րեացէ զտունս կաշառառուացն » , ասէ Յովբ :
Այլ և մի աշառեսցի 'ի մեծէ . զի ցրուես-
ցէ Աստուած զոսկերս մարդահաճոյից , ա-
սէ մարգարէն : Եւ որ մարդկան հաճոյ լինի ,
Քրիստոսի ծառայ չէ՛ գրէ Պօղոս : Եւ մի՛
վասն աղքատութեան՝ յիրաւունսն գթասցի 'ի
սնանկն . զի միապէս վճիռ եդ՝ որ ասացն .
« Մի՛ ակն առնուր հղօրին և մի՛ ողորմիւր աղ-
քատին 'ի դատաստանի » :

Իարձեալ իրաւացի թագաւորի յիրաւունս՝
որք յինքն հասանին , ոչ միշտ խեղդել զհնազան-
դեալսն , այլ և երբեմն ողորմութիւն խառ-
նել յիրաւունսն . զի զողորմութիւն և զճրշ-
մարտութիւն պահապան թագաւորի ասէ Սո-
ղոմոն , և յողորմութիւն և յիրաւունս օրհ-
նաբանի Աստուած . բայց առնել զողորմու-
թիւն արժան է ըստ տեղոյ և ըստ պատշա-
ճի , զի յիւրոցն իրաւանց , որպէս վերագոյնն
ասացաք , որքան որ թողուցու՝ զիւրոցն դատ-
նէ յանցանաց թողութիւն՝ յարդար դատաս-
տանէն Աստուծոյ . ապա թէ այր ընդ եղ-
բօր դատի , անդ ոչ է իրաւացի առնել ողոր-
մութիւն՝ զի այսու սոսիսի նորա՛ լինի անի-
րաւութիւն , բայց թէ միջնորդ հաշտութեան
եղեալ համոզեացէ զնոսա 'ի խաղաղութիւն
առանց իրաց շահու 'ի նոցանէ : Զի անկար է

Թագաւորաց զամենայն իրս ինքեամբ վճարել .
կացուցեն դատաւորս արդարակիրովս , անա-
գահ բարս ունել : Արք՝ որք ատեցին զհը-
պարտութիւն , և մի՛ միայն զայն բաւական
համարեցին 'ի նոսա ձգել զխիղճ դատաս-
տանին . և ասքս կաշառ 'ի վերայ իրաւանց
առնելով , և մեծապէս պահանջմամբն 'ի դա-
տաւորացն զինչան՝ հարկել զնոսա յանիրա-
ւութիւն , կամ 'ի դատաւորսն մի՛ ամե-
նեւին զել եւ զմուտ ընչից յանձնել , այլ
այլոց զնոյնն հաւատալ : Եւ նոցա զբան իրա-
ւանց եւ զդատաստանին միայն հոգալ : Եւ
կամ կշռել զծախս իւրեանց 'ի վերայ մը-
տիցն իւրեանց . և թէ աւելի հարկ հասցէ
ինքեան գիտութեամբ ամենեցուն հաւասա-
րաբար հանել յաշխարհէն՝ և զնոյն 'ի պէտս
հասարակաց հանել և ոչ իւրոյ անձին :

ԳԼՈՒԽ ԲԱՆԻՍ անհրաժեշտ ունել զբան
խոստման և զգրաւական հրամանս , սիրել զըս-
տուգութիւն և ճշմարիտ լինել յամենայնի ,
զի հրաման է Աստուծոյ լինել հաւատացելոցն
'ի նա այնն՝ այո , և ո՛չն՝ ոչ . մանաւանդ թա-
գաւորի , զի մի՛ ինչ ստութիւն ելցէ 'ի լե-
զուէ նորա , զի մարգարէութիւն 'ի շրթունս
Թագաւորի ասէ Սողոմոն . Եւ այսքան բա-
ւականասցի յաղագս թագաւորի : Եւ արդ որ-
պէս չէ բաւական առողջութիւն գլխոյ մի-

այն 'ի կատարելութիւն կենդանւոյ և ամենայն անդամոցն յարմարութիւն, այսպէս և 'ի հաստատութիւն աշխարհի ընդ թագաւորի գեղեցկութեան և լաւութեան պիտանացու է եւ իշխանացն բարիոք գոյն : Քանզի յերանելն Սողոմոնի զքաղաքս : Թագաւոր բարիոք ունելոյ, և զիշխանաց եւս զարդարասիրաց յիշէ որպէս և յԵրուսաղէմ զթշուառութեանն ճառէ . զնորին վասն ըստ մտաց և ըստ մարմնոյ մանուկ գոլոյ նորին արքայի և զիշխանացն եւս յիշէ՝ թէ . Ընդ առաւօտս ուտեն . այն է որովայնի ծառայեալք, ընդ առաւօտս ուտեն և զհետ լինին գինւոյն եւ երեկոյեան 'ի նմին, և 'ի գործս Տեառն ոչ հային . որպէս ասէ Եսայի . “ Ոչ պարապեալք խորհրդոյ եւ պահպանութեան աշխարհին ո : Վասն որոյ ըստ օրինի թագաւորի ամենայն բարիոք ճանապարհի եւ գործառնութեան նախանձաւորք լինիցին, նախ բարեպաշտութեամբ առ Աստուած պայծառանալ, որպէս զի հաւատարմութեամբ երկնաւոր թագաւորին՝ հաստատուն երեւեցի հաւատարմութիւն երկրաւորս թագաւորի : Զի որ երկնաւոր թագաւորին, յօրմէ զգոյն ունի և զբարիոք գոյն, և զինի անցաւորիս զվերստին նորոգիլն և զյաւիտենական կեանսն և զընդդիմաց սոցա զերկիւղն և զպատուիրանս նորա ոչ պահելով՝ ոչ գացի հաւատարիմ առ նա . զհարդ՝ երկրաւոր

Թագաւորի հաւատարիմ գտցի . յորմէ սակաւ
ընդունի զքարութեան կամ զքարկութեան
արկածս . Նոյնպէս պարտ է նոցին խոնար,
հուժեամբ եւ ամենայն առաքինութեամբ,
զարդարուն եւ բարեձեւ երեւիլ, մանաւանդ
սէր սերտ ունիլ առ Թագաւորն եւ առ մի-
մեանս : Մի՛ նախանձ ընդ շարսն եւ ընդ յա-
ռաջադիմութիւն իրերաց , եւ մի՛ մախանօք
այրիլ , զիրեարս իածատել , եւ ՚ի միմեանց
սատակիլ : Զի այս ախտ յոլովագոյն գտա-
նի առ նոսին առ առաւելայէս , յորժամ
զընկեր պատուեալ տեսանիցեն , առ որս ա-
սիցէ ոք թէ . Այր դու , ընդէր նախանձով ծըն-
գիս , եւ հաշիս ընդ բարձրանալ եղբօր քօ .
Թէ ախորժես հանգչել՝ անձին քում համարեա
զնորին բարին . այլ եւ սու քեզ խորհրդակից
զԱստուածաշունչ Գիրս՝ մանաւանդ զԻաւ-
թին , եւ ոչ երկիցես . « Յօրժամ մեծանայ մարդ
եւ բազում լինի յառք տան նորա ընդ նմա .
զի ոչ իջեն ընդ նմա ՚ի գերեզման . Զի մար-
դոյ որպէս խոտոյ են աւուրք իւր որպէս ծա-
ղիկ վայրի այնպէս ծաղկի . շնչէ ՚ի նմա հողմ ,
եւ ոչ է եւ ոչ ևս երեւի տեղի նորա » . եւ զայլս
որ համազօր են սոցին : Ապա թէ այսու ոչ
հաւանիս եւ մեծագոյն զփառս եւ զփարթա-
մաւթիւն կենցաղոյս կարծիցես , արա ընտրու-
թեամբ հաւանութիւն եւ հանդարտութիւն
մտոց քոյ . զի թէ նովաւ եւ նորին հնարիւք

և ջանալով է յաջողումն նորա եւ յառաջա-
դիմութիւն, և բանի և խորհրդոյ վիճակեալ,
որա զնմանագոյնն դու զնորա զիմաստու-
թիւն և զքաջութիւն և զայլն, և բարձ-
բացիս նմանագէս 'ի նորին ժամաւ և 'ի պա-
տիւ : Ապա թէ Բաւականն 'ի բարձանց բա-
ժանեաց զայն ունել նմա որպէս ասէ Յովբ .
“ Ի բնութեան ունել զլաւն և 'ի ստեղծման ”
և Հոգին բաժանէ, որպէս ասէ Պօղոս . “ Ումե-
մքն բան իմաստութեան, այլու՞ զօրութեան ո-
եւ այլոցն զայլն ըստ չափոյ հաւատոցն յա-
ջողեալ : Տես այր դու, մի գուցէ ընդ մարդ-
հակառակելով Աստուածամորա գառանիցիս .
զի ո՞վ է նա՞ որ 'ի քէն դատախետեալ լինի .
չնորհին օգուտն քեզ է և տքնելն 'ի նմին և
պատասխանի տալն Աստուծոյ 'ի վերայ նորա .
վասնորոյ . Լուեա 'ի բարկութենէ եւ հանգիլ
'ի պտմտութենէ . դարձ և մի ռիս պահեր .
զի թէ ոք մեղաւ քեզ եւ դեռեւս յեր-
կիւղի ես, մաղթեա զԱստուած, աղաչեա զնա,
առ որ և զկասկածանսն ունիցիս, և հաշտեա
ընդ նա թէ և ընչից քոց հասանիցէ տալ . զի
ասէ Սողոմոն . “ Տուրք գաղտնիք դարձու-
ցանէ զբարկութիւն ”, որպէս Յակոբուն՝
զԵսաւայն . և թէ այսու ոչ շիջանի, համբեր,
զի մասն Աստուծոյ է այն 'ի վերայ քո վասն
մեղաց . զի ասեցեալ 'ի Տեառնէ անկար 'ի բե-
բան նորա . ըստ այնմ “ Գուբ խոր է բերան

անօրինին և ատեցեալն յԱստուծոյ անկցի 'ի նա » : Ասա զՄիքիայն . « Բարկութեան Տեառն համբերեցից , զի մեղայ նմա » . ապա թէ աներկիւղ ետ 'ի նմանէ : Թոյլ տուր անձին քուժ հանգչիլ . որովհետեւ սուր թշնամւոյ քո ե , մնւտ 'ի սիրտ իւր և աղեղունք նոցա փշրեցան : Ապա թէ ախորժես վրէժ առնուլ , Թող այնմ . որ ասաց ' « Իմ է վրէժինդրութիւն և ես հատուցից ասէ Տէր » . և թէ « Ահ մեծ է անկանիլ 'ի ձեռս Աստուծոյ կենդանւոյ » : Իսկ թէ ոչ հանգչիս . այլ բաղձաս դու ինքն փոխարէն առնուլ , զգոյշ լիւր , մի գուցէ զայս առնելով 'ի մեծագոյն վնաս նորա անկանիցիս . զի իբրև զշուն յանդուգն լըբեալ յայտնեցի և անբերելի լիցի . այլ Թող զնա չարչարել ինքեան կարծեօք և երկիւղիւ առ 'ի քէն , քանզի իբրու գիտէ զչարսութիւն անձին իւրոյ ' միշտ յերկիւղի է 'ի քէն և 'ի կառկածանս :

Արդ՝ մի յայտնելով անհագս առնէր ըզնա : Այլ և այսու առ մարդիկ արգար երեւեցիս և իմնատուն , և նա անզգամ և անմիտ . և դատաստան անաչառ ընկալցի աստ մարմնով 'ի Տեառնէ և 'ի հանդերձեալն հոգւով և մարմնով : Այլ և իշխանին պատշաճ է իմաստութեան տարապիլ ոչ գինարբուաց և լկտի երգոց կամ ունայն զբազմանց խաղալ և որսոց , զի Գիրք զանմիտան և զան ,

ընդել բարան յորտոցն նշանակեն որպէս ըզը
Ներքովթն և զիւմայելն և զԵտաւն վայրագ
և անմիտ համարելով :

Արդ ընդէր մարդ բանի և հանձարոյ հա-
սեալ, զօրհանապազ շանց և թռչնոց պա-
բապելով՝ կրել զասացեալն . « Մարդ 'ի պա-
տուի էր և ոչ իմացաւ : հաւասարեցաւ ան,
բանից և անմտից և նմանեցաւ նոցա » . մին-
չեւ յերբ և կտորդ թռչնոց և գազանաց, և
զտիրազոյն մասնաւորն յայն վճարել, որոց ար-
ժան էր օրհնել և հոգալ զպէտտ հոգւոյ իւ-
րոյ և զաշխարհին, և մտերմաւ թեամբ ծա-
ռայել Աստուծոյ և թագաւորի : Իսկ եկե-
ղեցական գասուց արժան է զաստուածային
օրհնս 'ի ժամու և 'ի տարածամու յունկն
թագաւորի լսեցուցանել անպատկառ և ան-
ակն առնուլ : 'ի սահման թագաւորական ուղ-
ղութեան՝ զնա յորդորել, և զաշխարհ 'ի նա-
ցին հնազանդութիւն յորդորել : Ուստեցա-
նել ծառայել մարմնաւոր տեառն՝ որպէս Աս-
տուծոյ, և զամենայն հարկս և զիրաւունս ա-
ռանց արանջման յարքունիս վճարել : այլ եւ
ինքեանք նոքօք հանգերձ արազենն աղօթս և
պազատանս աշխարհի և թագաւորի : սլարա-
գաց ամօք մնալ 'ի խաղաղութեան : Եւ այսա-
քիկ այսքան :

Բայց գիտել արժան է՝ զի են երեք իբր, որ
հաստատուն պահեն զթագաւորութիւն : Ա-

ուաջինն այս , զոր գրեցաքս , բարեպաշտու-
թիւն հաւատոյ՝ և ուղղութիւն գործոց . և
երկրորդ՝ սեռական և հայրենեօք իրաւացի՝
'ի նախեեաց ունել զթագաւորութիւն : Եւ
երրորդ իմաստութեամբ և խոհականութեամբ
վարել զնոյն :

Արդ զառաջինն վստահ գոլով յԱստուած՝
յաստուածասէր և 'ի բարեսէր կամս մերոյ՝
պահակաւոր Արքայիս նուիրեցելոյ , ազօթս օ-
ժանդակեսցուք սմա լիով առնել զասացեալս և
մշտնջենաւորիլ 'ի տոյն : Իսկ զերկրորդն յայտնաւ
պէս ունիլ սմա յոյժ ծանօթ՝ զի է մեր . զի է սա՛ի
Ռուբինեանց անտի , որ արեանառուք էին մե-
ծի արքային Գագկայ Բագրատունւոյ Մամի-
կոնւոյ . զի յետ մահուան նախասացեալ արքա-
յիդ , եկեալ մեծն Ռուբին՝ 'ի կառս տար .
մախուժք ժողովրդովք և տիրեալ անդ հան-
գեաւ 'ի Քրիստոս , ծնեալ զորդի Կոստանդին
անուն . որ տիրեաց Փռիւզիոյ եւ եդ Տուն
տէրութեան իւրոյ 'ի հռչակաւոր գղեակն
Վահկայ . և կալեալ քաջութեամբ զյոլով մա-
տն Կիլիկիոյ , և փոխեալ առ Քրիստոս : Իսա
զիշխանութիւն նորա էրեց որդի նորա Թա-
րոս , ունելով ընդ ինքեան զեղբայր իւր կրթ-
տակր զԼեւոն : Սա՛ ընդարձակեաց զիշխա-
նութիւն հօր իւրոյ . էառ և զմեծն Անարզա-
բա . և շինեաց զտաճար Տիրմօրն՝ որ 'ի նմա-
նէ եղեալ անդ՝ և զնորին պատկերն : Եւ

հանգեաւ 'ի Քրիստոս տուեալ զիշխանու-
թիւն եղբօր իւրոյ Լեւոնի, որ և ծնաւ ե-
րիս որդիս, զԹորոս, և զՍտեփանէ, և ըզ-
Մլէհ, և եկեալ Պերսիեռուժէն կայսրն 'ի
Աիլիկիա ըմբռնեալ զԼեւոն, և զորդին իւր
զԹորոս տարաւ 'ի Աստանդնուպօլիս: Եւ
Ստեփանէ և Մելիէն յԵդեսիայ գնացեալ է-
ին առ քեռին իւրեանց: Մեռաւ Լեւոն 'ի
Աստանդնուպօլիս, և Թորոս եկն զկնի Պեր-
սիեռուժէնի 'ի Աիլիկիա: Եւ յետ մահուան կայ-
սրն՝ ելեալ յԱնարզաբա յորս էրէոց, 'ի խնա-
մոցն Աստուծոյ գտեալ զեղբայրն իւր զՍտե-
փանէ, գարձեալ տիրեաց Աիլիկոյ և Ստեփա-
նէ գնացեալ 'ի Սեաւ լեառն, տիրեաց մինչեւ
'ի Գերմանիկէ, և անդ մեռաւ 'ի Յունաց տապա-
կեալ: Եւ եթող երկուս որդիս զՌուբէն և զԼե-
ւոն՝ որ առաջին օծաւ Թագաւոր Հայոց 'ի վե-
րստին նորոգման Թագաւորութեանն 'ի Աիլի-
կիա: Բազում քաջութիւնս արարեալ Թորոսի
և տիրեալ բոլոր Աիլիկիոյ և Սալքիոյ հան-
գեաւ 'ի Քրիստոս: Եւ եղբայր նորա Մլ-
լէհ էառ զիշխանութիւն նորին, և յետ նորա
որդիքն Ստեփանէի, նախ Ռուբէն, և 'ի փո-
խելն առ Քրիստոս Լեւոն, որ պսակեցաւ
Թագաւոր Հայոց՝ 'ի Յունաց և 'ի Հռովմայե-
ցոց: Եւ յետ նորա գուստր նորա Զապէլ
Թագուհի լծակցեալ ընդ բարեպաշտի Հեթ-
մոյ Թագաւորեալ, և բազում բարութիւնս

և ուզողութիւնս Հայոց ցուցեալ, ծնաւ զմե-
քս պսակաւորս Լեւոն, որ այժմ' օծանի Թա-
գաւոր, որպէս զի լինել սմա՝ ըստ իշխանու-
թեան տասներորդ. 'ի Ռուբենայ: Եւ ըստ ծը-
ննդարանութեան եօթներորդ թուելով զայս
ձեւ օրինակի. իշխան Ռուբէն, իշխան Կոս-
տանդին, իշխան մեծն Թորոս Պաււտոս
Սեւաստոան կոչեցեալ, իշխան Լեւոն, իշ-
խան Թորոս, իշխան Մլէհ, իշխան Ռու-
բէն, Թագաւոր Լեւոն, Զապէլն Թագուհի.
Իսկ ըստ ծննդենէ սա որդի Զապելի դստեր
Լեւոնի արքայի, որդւոյ Ստեփանէի, որդոյ
Լեւոնի, որդւոյ Կոստանդեայ, որդւոյ Ռու-
բէնի 'ի Շառաւեղէ Գաղկայ յագգէ Բագրա-
տունւոյ 'ի ցեղէն մեծին Գաւթի Թագաւորի
և մարգարէի: Իսկ զերրորդն, որ նա ինքն է ի-
մաստութիւն և հանձար, այնքան ընկալեալ
ունի եւ զընդարձակութիւն սրտի մինչ զի
իրբեւ զայս համաշխարական առ ամենեւեան
քարոզեալ է վասն որոյ ինձ լռելի է. զի մի
թուեցայց մարգահաճութեամբ իմն առա-
կանէ խօսիլ, զոր գթութիւնն Աստուծոյ պա-
հեաց զոս զաւակ սուրբ արձանութեան:

Հանեալ յերկաթի հնոցէն Եգիպտոսի՝ ըյս
ծագեաց մեզ սիննքոր ժողովրդեան իւրոյ
և այսօր կոչեաց յաթող Թագաւորութեան
տանս Թորգոմայ Հայկաղեան զարմի զետե-
ղելոցս 'ի նահանգս Սալբիայ եւ Կիլիկիոյ:

որոց տիրեալ թագաւորէ սա: Ասանորոյ մաղ-
թեցութիւնք միաբան 'ի բոլոր սրտէ և յամենայն
անձնէ և 'ի զօրութենէ զերկնաւոր թագա-
ւորն մեր զՔրիստոս • զի շնորհեցէ նորին-
ծայ մերոյ թագաւորի Լեւանի զբարեպաշ-
տութիւնն Դաւթի, զԵղեկիայ, զՅովսիայ,
զԿոստանդիանոսի, զԹէոդոսի, զՏրդատայ •
զիմաստութիւնն Սողոմոնի և Զօրաբարեւի,
զԴանիէլի և զՅովսեփայ • զողորմածութիւնն
Աբրահամու և զՅորայ եւ զսոհեմութիւնն
Իսահակայ և Իսրայելի, զհեղութիւնն Մով-
սիսի և զԴաւթի • զքաջութիւնն Սամիսոնի
և զՏրդատայ և զամենայն բարեձեւութիւնս
ըստ նմանութեան բարեզարդ թագաւորացն,
որ 'ի հնաւմն և 'ի նորումս: Կայցէ և մնաս-
ցէ անուն սորա ընդ արեւու յառաջ քան
զլուսին յաղգէ մինչեւ յաղգ: Մագեոցի յա-
ւուրս սորա արդարութիւն բազում, խաղա-
ղութիւն մինչեւ կատարեցի լուսին: Տի-
րեցէ սա 'ի ծովէ մինչեւ 'ի ծով, 'ի գե-
տոց մինչ 'ի ծագս աշխարհի: Առաջի սորա
թշնամիք իւր անկցին, և զհող ոտից սորա լի-
ղեցեն: Գտցէ սա շնորհ 'ի Տեառնէ առաջի ամե-
նայն բռնաւորաց աշխարհիս: Եւ զամենայն
բարբառ, որ յարիցէ 'ի վերայ սորա, 'ի պար-
տութիւն մատնեցէ Տէր: Երկայն ամօք և
խաղաղական կենդանութեամբ, թագաւո-
րեցէ սա 'ի կեանս յայս, ծիրանածին որդ-

ւովք իւրովք և զարմիւ : Եւ 'ի հանգերձեալն սրբոց Թագաւորացն Թագակից և աթոռակից եղիցի : Մի պակասեոցի 'ի զաւակէ սուրա՝ այր : որ նստցի յաթոռ Թագաւորութեան ազգիս Հայկազեան : Այլ ըստ աւուրց երկնից որ 'ի վերայ երկրի և ըստ պայծառութեան լուսաւորացն եղիցի մշտնջենաւորութիւն զաւակաց սորա և պայծառութիւն աշխարհի : Ի իառս և 'ի պատիւ Եկեղեցւոյ Աստուծոյ՝ և հաւատացելոց Քրիստոսի , ընդ գլխոյս շնորհարաշխութեան և ամենայն անդամացս յարմարութեան շնորհեսցի յառատապարգեւ Տեառնէն մերմէ Յիսուսէ Քրիստոսէ շնորհք սղորմութեան , և պարգեւք բարութեան . նախ քահանականս լութեան , և քահանայականին կարողութեան , անբիծ Հայրաստիս մերոյ . պարկեշտ պաշտամամբ ըստ պասաւորել աստուածային խորհրդոյս յեկեղեցի սուրբ 'ի յերկրի : Գթութիւն մարդասէր Հոգւոյն Աստուծոյ հանգիցէ 'ի հոգիս ննջեցելոցն մերոց և յարուցէ զնոսա 'ի կեանիւրս և 'ի հանգիստն յաւիտենական , մանաւանդ զնախայիշատակեալ նախնիս մերս Պրսակաւորի , զՌուբինեանսն՝ յորոց երանելին Զապէլ Թագուհի : որոյ սղորմութեանն և առատ պարգեւացն , որ առ ուսումնականսն՝ պտուղ է մերս նուաստութիւն և եւս վեհագունից քան զմեզ՝ ընդ որում զանձառ բարու .

Թիւնսն ընկալցի փոխարէն 'ի հանդերձեալ հա-
տուցման արդարոց • և ձեզ ամենեցուն լսո-
ղացդ շնորհեսցէ Տէր վարձս բարեաց • որպէս
զի յամենեցունց փառաւորեսցի՝ Միասնա-
կան Սուրբ Երրորդութիւնն և մի Աստուա-
ծութիւնն այժմ և միշտ և յաւիտեանս յա-
ւիտենից ամէն •



UNIVERSITY OF CALIFORNIA LIBRARY

Los Angeles

This book is DUE on the last date stamped below.

--
